

KA JINGPOLE SHAPNANG KA KITEH

M. B. JYRWA

Acc. No. 9644/8.1
Class No 895.93 J.99. Ka
Author M B Syrua
Title Ka Singpule Shaphang
Ka Ktien

Acc. No. 9644/8.1
STATE CENTRAL LIBRARY
GOVERNMENT OF MEGHALAYA
SHILLONG

1. Books may be retained for a period not exceeding 15 days by members.
2. Books may be renewed on request at the discretion of the Librarian.
3. Dog-earing the pages of a book, marking or writing therein with ink or pencil, tearing or taking out its pages or otherwise damaging it, will constitute an injury to a book.
4. Any such injury to a book is a serious offence; Unless a borrower points out the injury at the time of borrowing the book, he/she shall be required to replace the book or pay its price.

Help to keep this book fresh & clean

1993

Published by


KHASI BOOK STALL

**Room No. 38 – Synod Super Market
Mawkhar – Shillong 793 002.**

Ka Jingpule Shaphang Ka Ktien

1st Edition 1995 - 5000 Copies

© Copyright Author



GG 715

Don Bosco Press,
Don Bosco Technical School
Shillong - 793 003
Meghalaya

Ka Jinglamphang

Kane ka kot ka long shi bynta na ki jingkren ba la kren ha ka **Refresher-Cum-Orientation Course in Khasi Language Teaching** na ka bynta ki nonghikai kiba hikai Khasi ha College. Ka la don ka jingpyrkhat hapdeng ki nonghikai ba dei ban kren ei ei halor ka phang **Ka Jinghikai Lingkwistik**.

Kane ka kot ka long ka ba lyngkot eh. La kdew ia ki ba bun kiei kiei tang kum ban shu mait phang: namarkata ym lah ban ong ba ka long tang ma ka hi ka ba dei ban pule. Ha ka bynta ba shadien jong ka kot la buh ia ki kyrteng jong kiwei pat ki kot ia ki ba dei ban pule da kito ki ba kwah ban shemphang shuh shuh halor ki bynta ba pher jong ka tuad jingpule lingkwistik.

Ka la don ka jingpyrshang ban spel Khasi ia ki kyntien English ki ba beit ki ba marwei bad jahap ha ka spel Khasi ia kito ki bym beit, ki ba ha ka rukom phreis, ym shym la leh kumta. Lah ban don ka jingpyrshah ia kane da ki katto katne, hyurei nga ngeit kane ka long ka rukom ba dei ban bud haba lah khuang ban ai ia kito ki kyntien shim kyliang ka dur bad sur Khasi bad hapoh ki saikun ka kraumar Khasi.

Ka kot ka long ka jingpyrshang ban ai ha ki nongpule ka lad ban sngewthuh, kaei ka lingkwistik, bad kiei ki bynta ba pher ba don ha ka.

Ka bynta ba dei ia ka **Tense, Aspect** bad **Modal** ka hap ha ka Syutak. Ki nongpule kin shem ba kane ka kham pher na kiei kiei ba la thoh shaphang jong ki ha kiwei pat ki kot Khasi. Ki nuksa ba la kdew ha kawei pa kawei ka jingpyndonkam, nga ngeit ki iarap ban pynsngewthuh ia ka jingapher kawei ka jingpyndonkam na kawei pat.

Ha Sharing Cottage,
Lumbhalang,
Nongthymmai,
Shillong - 793 014.

M. B. Jyrwa

KI LYNNONG

Peij

Ka Jinglamphang	i
1. Ka Lingkwistik	1
2. Ka Phonetik Bad Ka Phonoloji	2
3. Ka Morpholoji	3
4. Ka Tense	8
5. Ka Aspek (Aspect)	5
6. Ka Jingiakhleh Ki Aspect Marker Bad ki Modality Marker	6

Ki Kot Ba la Pyndonkam

- Bareh, Mondon : **Khasi English Course And Grammar**
Ri Khasi Press, Shillong, 1929.
- Comrie, B. : **Aspect**, Cambridge University Press, 1976
- Comrie, B. : **Tense**, Cambridge University Press, 1985
- Crystal, David : **Linguistics**, Penguin Books, Reprint, 1974
- Crystal, David : **A First Dictionary Of Linguistics And Phonetics**, Andre Deautch, London, 1980
- Jyrwa, M. B. : **A Contrastive Study of Tense And Aspect In Khasi And English With Reference To The Teaching of English To Khasi Speakers**, M.ED. Diss. submitted to the University of Manchester, U. K. 1984
- Robins, R. H. : **General linguistics: An Introductory Survey**, Longman Linguistics Library, London, 3rd. ed, 1980
- Singh, N. : **Hint On the Study Of The Khasi Language**, KJP Synod, Shillong, 9th. ed 1979
- Sten, H. W. : **Ka Histori Ka Ktien Khasi**, Shillong, 1980
- Sten, H.W. : **Tense In Khasi Language" in Khasi Studies**, Vol. I. No. 1 April-June. 1987

Balei ngi dei ban pule lingkwistik ?

Ban jubab ia kane ka jingkylli, nyngkong eh dei ban sngewthuh kaei ka lingkwistik. Ka lingkwistik ka dei ka tnad jingpule ba dei shaphang ka ktien. Ka lah ban long kano kano ka ktien jong kano kano ka jaidbynriew ha kano kano ka dong jong ka pyrthei. Ka ktien, kum ka jingpule ka lah ban long kato ia ka ba ym don briew shuh ba kren ia ka, e.g., ka Latin, hynrei la pule tang namar ki jingthoh bad ki jingpyniaid niam (liturgy) ne jingmane Blei. Ia ka ktien bym don shuh ba kren, la ong ka ktien ka ba la iap. Ki ba bun ki ktien ha ka pyrthei kim dei ki ba la iap: kine ki long ka bynta ba kongsan eh ha ka jingpule lingkwistik.

Kat kum ka lingkwistik ia ka ktien la pule ha ki lai kyrdan ba pher kumne: **Phonology**, **Morphology** bad **Syntax**, (Yn spel Khasi ia kine **Phonoloji**, **Morpholoji** bad **Syntak**). Ka Phonoloji ka batai ia ka ktien ha ka liang ki **jingsawa**, kata, ki sur sawa **Bowel** (vowel) bad **Konsonan** (Consonant) ki ba don ha kata ka ktien. Ka Morpholoji pat ka batai ia ka dur jong ki kynnoh bad kyntien. Kane ka peit ia ki ba kum kino ki jingiasnoh lang ki bowel bad konsonan ki ba lah ban pdiang bad bym lah ban pdiang. Kum ka nuksa, ka morpholoji ka iathuh ia ngi ba ha ka Khasi ia u jingsawa / b/ ym lah ban pynbud da u /p/ lada u /b/ bad /p/ ki hap hapoh kawei ka kynnoh. Dei na kane ka daw, ha Ka Khasi ngim don kynnoh ne kyntien ba sdang da ki **bp**. Ka Syntak pat ka peit ia ka ktien na ka liang kumno ki kyntien ki pynlong ki jingong ba don jingmut bad ki aiñ trei kam ki ba kumno ki don ha kata ka ktien. Ki aiñ trei kam, ngi dei ban sngewthuh, ki pher kawei na kawei pat ka ktien khamtam lei lei lada kita ki ktien ki long na ki kur (language family) ki ba ia pher.

Ka lingkwistik ka long ka jingpule ka ba sngewtynnad; ka ai ha ki nongpule ki jingshemphang ba thymmai shaphang la ka jong ka ktien. Hynrei don bun ki ba pyrkhath ba ka lingkwistik kam long ka jingpule ka ba donkam. Ki ong balei ban da pule shaphang ka ktien haba ia ka la nang lypa

naduh dang khadphra bnai ei ci. Kane ka jingong ka long khamtam lada ka ktien ba pule ka dei ka ktien lajong. Shi sien pyrkhat, lehse ngin pyrkhat ba kane ka jingkdew ka long ka ba shongnia. Hynrei kam long ka nia ka ba lah ban ieng ynda haba la buh lang ia ka ha khmat kiwei pat ki tnad jingpule. Peit ia ka jingpule ka ba ia dei bad ki khmat (ophthalmoloji/ophthalmology). Baroh ngi don khmat, kata khlem da kren ia kito ki ba anna. Da ki khmat ngi lah ban iohi ia lade ha ka iit khnih, ha ka um ha top, ha khiew, ha pung etc.; ngi lah ban iohi ia kiwei ki para briew, mrad, jingthung, jingpynlong ha ka mariang, tiar ba la shua da ki briew; ngi lah ban iohi hajan bad shajugai ruh. Ngı don ki khmat bad ngi la nang ban peit lyngba jong ki naduh ba ngi dang khunlung. Te haba kumta donkam auu ban dang pule shaphang ki khmat, ne ban long doktor khmat. Ki jingpule, la ka long lingkwistik ne ophthalmoloji, ki long ki jingpule ki ba don la ka jong ka dor, la ka jong ka jingmyntoi: ki long ia ki ba ngim lah ban shu kyntait bad khein niut ia ki.

Haba ia mujor ia ka lingkwistik bad ka ophthalmoloji lah ban pynrem ia ka lingkwistik kum ka jingpule ka bym da myntoi eh ia u ba bun ba lang. Ka ophthalmoloji ka lah ban iarap ia ki briew da ka ba thew katno u briew u lah ban iohi hajan ne jngai, ia ki dak ki ba kumno u lah ban iohi. Halor kane lah ban ai dawai khmat ne iit khmat ki ba biang ia ka jingdonkam uta u briew. Lada don ka jingshah tap kata shiliang ne baroh arliang, lah ban weng noh ia kata. Lah ban buji ia ki khmat ki ba la sniew da kiwei pat ki ba bha. Lah ban shum ia ki khmat jong ki briew ki ba la pang eh bad mynsaw jur ki ba ap sa tang ban iap, buh tyngkai ia kine ha ki jaka ba la pykhreh lypa, bad sa buh pat ia ki ha uno uno u briew u ba ki khmat trai jong u kim trei kam shuh. Ki jingmyntoi ki long ki ba bun shisha, bad kumta ruh ka long bad ka lingkwistik.

Haba don kano kano ka jingbymlah kren, kata naduh dang kha, ne ka jinglah syndet ka jinglah ban kren da u briew u ba la ju nang ban kren na ka daw ka jingkyndit ne aksiden auu re, ka jingthun, ne ka jingbymbiang ha ka khleli ne bor pyrkhat - ka ba pynpaw ia kane ka long borabor ba ym sngewthuh shuh ia ka ba ki kren -- daei yn iarap ? Don shibun ki lad jingiarap bad ka jingjop jong ka jingiarap ka shong ha la ka jong ka jong ka jingidei hynrei ngi dei ban tip ba kawei na ki lad jingiarap ka dei ka lingkwistik. Dei na kane ka daw ba shatai sha ri sepngi la pule ia ka lingkwistik

ym tang da ki nongpule ha college bad university hynrei da ki ba trei ia ki kam kum ki **Speech Therapist, Audiologist, Psychologist, Paediatrician** bad **Language Pathologist**.

Ki jingshitom kum kitei ba la kdew haneng kim da kynrei shane sha ngi, hynrei ka jingpule lingkwistik kam long eh tang na ka bynta ki jingpang ba ia dei bad ka jingthlun ne jingbymlah kren, hynrei ka long kyrpang ban sngewthuh kaei ka ktien, kumno ka trei kam bad kumno ruh la pyndonkam ia ka da ki briew ki ba pher ba pher.

Ki jinglong ba kongsan jong ka ktien

Ka jinglong ba kongsan eh jong ka ktien ka long ba ka long na ka ka lad lyngba da ka ba ngi ia sngewthuh iwei ia iwei. Kum ka lad ia sngewthuh iwei ia iwei, ka ktien ka long kum kiwei pat ki lad ia sngewthuh iwei ia iwei, kata kum ka jinglakren da ka ba shu pyni dak da ka khlieh, khmut khmat, kti bad kjat. Hynrei ka ktien ka pher na kine namar ki kyntien hapoh jong ka ki ia id katba kum ki ain trei kam bad namarkata, ka don jingthukna ha ka. Kiwei pat ki jingpyni dak kim long ki ba thikna, e.g., ka jingkyrdem kjat ha madan ka lah ban mut ka jingpyniahap sur bad ka jingrwai, hynrei ka lah ruh ban long u dak sangeh (pause) jong ka jingmut jingpyrkhat, ka lah ruh ban long u dak ka jingnang san (progression) jong ka jingmut ha u briew. Ia kine ki jingmut ba pher ha ka jingkyrdem kjat lah ban sngewthuh tang da uta hi u nongkyrdem. Uwei pat u nongkyrdem u lah ban nym don ia kijuh ki jingmut ha u ha ba u kyrdem kjat. Ka jingthikna jong ki ain trei kam jong kano kano ka ktien ka don naduh ka kyrdan phonoloji, morpholoji haduh syntak. Ha ka phonoloji ngi iohi ba ia ki kyntien lane ki kynnoh ym lah ban pynlong tang da ki konsonan suda, katba lah ban leh kumta da ki bowel. Ngii iohi shuh shuh ba ha ka Khasi ngim don ia u konsonan /g/ (wat la ngi don ha ki dak), ngi don tang u /k/. Dei na kane ka daw ba ia ki kyntien English ki ba sdang da u /g/ e.g., **girl**, ki ba bun ki Khasi ki kynnoh ***kirl**. Nalor kine, ngi iohi ruh ba uwei u konsonan u shah ktah pynkylla ha uwei pat u konsonan u ba bud mar syndah, e.g., u **ng** (/ŋ/) ha **jing**-u kylla **m** (/m/) lada u konsonan u ba bud u dei u **b** (/b/): kumta **jingbam** ka kylla noh **jimbam**. U **m** (/m/) u ktah kylla sa ia u **i** (/i/) ha kata ka rukom ba u **i** um jrong shuh, hynrei u kham kynriah ban sawa noh kum u **y** (/t/) bad kumta na ka **jimbam** ngi ioh **jymbam** ha ka jingong **Sa wan thied jymbam ho**

Ka jingthikna bad jingbeit ka rukom trei kam jong kano kano ka ktien ka paw ha ka kyrdan morpholoji ruh. Shim ia ka kynnoh **jing-**. Phin shem ba kane ka wan borabor na khmat jong kiwei pat ki kyntien kum **jingthiah**, **jingsuk**. Lada ka **jing-** ka ia don lang bad kiwei pat ki prefix, kum **pyn**, ka jaka jong ka **jing**, kan long borabor ha kadiang duh, e.g., **jingpynthiang**, **jingpyniathoh**. Ka **jing**, kam lah ban don hapdeng ne ha dong na ka liang kamon jong ka kyntien, e.g. ***pynjingthiang**, ***pynthiangjing**.

Ha ka kyrdan syntak ruh ki aiñ ba ryntih bad thikna ki trei kam, e.g., ka kyrtenge jong uno uno u briew ne mrad kam lah ban ieng khlem ka Noun Marker (NM) ka ba biang, kum **u John**, **u Tiffin**. Shisha, ka Third person Noun ha ka Khasi kam lah ieng khlem ki Noun Marker ha shuwa jong ki. Ila ka **u John**, **u** ka dei NM bad **John** ka Third Person Noun lane Proper Noun. Don sa kiwei pat ki nuksa ba lah ban kdew ban kyrshan ia ka jingbat aiñ ka ktien tangba kane kam dei ka jaka ban ia kren shaphang kane.

Kawei pat ka jinglong kyrpang jong ka ktien ka long ka jingbud laiñ jong kawei ka kyntien ia kawei pat. Kane kamut ba haba kren, u nongkren u sdang na kawei ka kyntien bad pynbud ia kata sa da kawei pat bad haba sngap sngew la kumba ki kyntien bad jingong baroh ki ia bud laiñ. Kane ka jingtabud ka paw khamtam eh ynda haba ia ka jingkren la thoh.

Ka jinglong kaba lai ka long ka jinglong ar syrtap. Kane ka mut ba don ar syrtap ki jingpynpeit ha shuwa ban ong ia kano kano ka jingong. Ka ba nyngkong ka long ba u ba kren u dei ban jied bad buh beit shuwa ia ki sur sawa bowel bad konsonan ha ki kyntien. Ha kajuha ka por u nongkren u buh beit ia kita ki kyntien ba u la jied ha ka dur ka sentens. Kane ka jingbuh beit kumne ka pynnih ia ar tylli ki bynta ba kongsan jong ka ktien: (i) Ka jingbuh beit ia ki jingsawa (Phonological system) bad (ii) ka jingbuh beit ia ki kyntien kat kum ka Kramar (Grammatical system). Ia kine ar kyrdan ki jingbuh beit ba donkam ha shuwa ba u ba kren un lah ban kren la khot ka **Double Articulation** lane jinglong ba ar syrtap jong ka ktien.

Ngi la kdew sha khmat ba ka ktien ka pyndonkam ia ki bowel bad konsonan, bad kine ki long ki ba tang khyndiat eh ha ka jingbun. (Lada khein ia kane tang na ka liang ki dak a, b, k.....y ngi lohi ba ka Khasi ka don tang arphew

lai (23 tylli). Hynrei na ki bowel bad konsonan ba tang khyndiat tylli ngi lah ban thaw da ki phew hajar ki kyntien, bad ruh ki sentens ki ba thymnai ia ki ba ym lah ruh ban nlew. Lada jia ba ha ka kiten ym don lypa ki kyntien ki ba blang na ka bynta kawei ka tlar ne jingsniew, ki briew ki ba kren ia kata ka ktien ki lah ban thaw kyntien; ki lah ban shim kyliang na kiwei ki ktien bad wanrah ia ki hapoh ka **phonological system** bad **grammatical system** lajong. Kane ka kdew sha kawei ka jinglong ba kyrpang jong ka ktien bad kata ka long ba ka lah ban pynroi ia lade haduh katta katta. Dei ban pynkynmaw ba ka jingpynroi ka dei ban long kat kum ki ain trei kam jong kata ka ktien. Dei na kane ka daw jong ka jingiasyrtap kawei ka jingbuh beif ha kawei pat ba la ong ba ka ktien ka dei ka 'system of svstems'.

Kawei pat ka jinglong ba kongsan jong ka ktien ka long ba ka jingsawa jong ka kam don jingiadei ei ei ruh em bad ka jingmut. Kane ka mut ba ki kyntien bad jingong kim don jingiadei ei ei bad ki jingmut ki ba don ha ki. Ki jingmut ki ba don ha ki ki long ki ba la shu ai ha ki pateng la pateng da ki briew ki ba kren ia kata ka ktien. Dei na kata ka daw ba ia kajuh kaei kaei e.g., Ka **Ing** ha ka Khasi ka long ka **ing**, ha ka English ka long **house** bad ha ka Hindi ka long **ghar**. Shisha don ki kyntien ha kano kano ka ktien ruh kiba don ka jingiadei ba jan bad ka jingmut jong ki. Lada ngi shum ia ka kyntien **splash** ha ka English, ngi sngewthuh ba ka jingmut ka ia jan bad ka jingsawa, kata, ka jingtheh ia kano kano ka ba long um ka ba da sawa artad **splash**. **Phiaw** ha ka Khasi ka long kawei ka kyntien ka ba ka jingmut jong ka ka iajan bha bad ka jingsawa. Hynrei ki ba kum kine ki kyntien kim long ki ba bun.

Ka ba kham kyrpang ka jinglong jong ka ktien ka long ba lah ban pyndonkam ia ka lyngba ki lad ki lynti ba pher bapher. Lah ban pyndonkam ia ka ha ka jinglong tynrai jong ka (primary nature) da ka ba kren, nangta sa da ka ba thoh, da ka **short hand, Braille, Morse, Sign language** bad kiwei. Tangba dei ban kdew hangne ba kine baroh ki dei ban iaid katkum ki ain phonoloji, morpholoji bad syntak jong kala ka ktien. Kiwei pat ki lad pynsngewthuh (system of comunication) kum ka Traphik lait (Traffic light) ne ki dak kdew ha surok (road sign) ki long ki lad ba lah ban pyndonkam tang shi rukom, ym ar lai kum ka ktien.

Ki traphik lait bad ki **road sign** ki don tang shi jingmut hynrei ka ktien ka lah ban don palat ia kawei ka jingmut.

Kane ka shong kat kum ki briew kiba pyndonkam ia ka, bad kat kum kiwei pat ki jingmut ba lah ban pynphnieng nangta. Kumta **u bitor iong** u lah ban long u bitor u ba ka rong jong u ka long ka ba iong; u lah ruh ban mut beit ka kiad ia u nongdih kiad. Ia ki traphik lait bad **road sign** lah ban pyndonkam beit tang ha ki surok rit ne surok bah, hynrei ia ka ktien lah ban pyndonkam ha ing, ha surok, ha skul, ha jingthiah, ha ka **telephone**, lah ban kren ia ki jingjia ki ba la jia bad bym pat jia, ban ai dur ia ka jingmutdur bad ia kine baroh lah ban leh tang da ka ba buh beit ia ki kyntien tang ba ha ka rukom ka ba kham kyllaiñ lehse (organised the material in a complex manner).

Ka ktien ka long kata ia ka ba la shu ioh pateng na ka ba kha ba long, bad na ka imlang sahlang. Ka jingioh pateng na ka ba kha (genetic) ka long ba u khynnah u ioh ia ka ktien ba kren ki kmie ki kpa, bad u san ryngkat bad ki jinglong jong baroh ar : ka kmie bad u kpa. Na ka imlang sahlang u lah ban ioh ia ka ktien ka bym dei ne ka ba dei kajuh bad kata ka ba u ioh na ki kmie ki kpa. Lada ha ka imlang sahlang ka ktien ka pher na ka jong ki kmie ki kpa, ia kata ruh u khynnah u lah ban nang. Kane ka mut ba ia ka ktien lah ban ioh pateng, lah ban nang da ka ba don hapdeng jong ka bad da ka ba shah hikai ruh.

Ki tnad ha ka Lingkwistik

Ka lingkwistik kum ka jingpule ka kynthup ia kine ki tnad harum.

Historikal lingkwistik

Ka jingpule shaphang kumno ka ktien ka kylla bad roi kat kum ka jingiaid ka por ka dei ka historikal lingkwistik. Hangne ka jingpule ka kylli balei ka ktien ka kylla bad kumno ka roi. Ka ktien ka 'kylla' kat kum ka jingdonkam ki briew ki ba kren ia ka. Ka kyntien 'kylla' ka kham mut ia ka jingduh noh jong katto katne ki kyntien bad ka jingmih da kiwei ha ka jaka jong ki. Hangne ha Shillong ki kyntien **sohpairah**, **nub** ki ba thew ia ki tiar ki ba u Khasi hyndai u pyndonkam ha ka jaka ka **sabon** ki la nang jah noh. Ki ba tip shaphang kine ki don bun hynrei ym ioh lad ban pyndonkam ia kine man la ka sngi namar ba ha kine ki sngi ngim ioh **sohpairah** lane **nub** ban sum, sait lane khlieng da ki. Kim die **sohpairah** lane **nub**, hynrei ki die sabun, shampu

bad powder saitjaiñ. Ka sabon ba shna na u sohpairah kam long shuh u sohpairah hynrei ka sabon. Te kumta ngi iohi ba ka jingjah jong ki kyntien na ka jingpyndonkam ka ñaid ryngkat bad ka jingioh ne jingbymiñoh kynrei ña ki mar ki ba da kata ka kyrteng. Ki kyrteng mar ki ba kynrei, bad ki ba ki briew ki pyndonkam bha ki sah kynrei kito ki bym kynrei ki duh noh bad ha ka jaka jong ki wan noh da kiwei pat. Ka jingkylla ha ka liang ki kyntien ka long ruh na ka daw ka jingiaxhleñ bad kiwei pat ki jaidbynriew ki ba kren da kawei pat ka ktien. Ka kyntien **kyrkit** kam shym don lypa ha ka Khasi, hynrei ka mih ynda haba u Phareng u wan shong ha kine ki lum bad u ñaleh kai **cricket** ha **Madan Kyrkit** lane **Kyrkit Laban**. Ka kyntien **tikir** (Ka Kot Tikir) ka ba long ka kyrteng jong kawei na ki kot niam ka Balang presbyterian ka mih na ka kyntien English **Catechist**. Ka jingkylla na ka **Cricket** sha ka **Kyrkit** bad **Catechist** sha **ka kot Tikir** ka long ka jingkylla khamtam eh na ka liang ka jingkyñnoh ne jingsawa haba kyñnoh. Lada peit bñiah ña kane ka jingkylla lah ban iohi ña kine ki jingshisha harum.

Haba phiah ña ka kyntien **cricket** ha ki ar kyñnoh ngin ioh **cric** bad **ket**. Ka jingkylli ka mih hato kumno **cric** ka kylla **kyr** bad **ket** pat **kit**. Katba lah ban sngewthuh bad ban lum jingtip ka ktien Khasi kam don kyntien ba don ar kyñnoh ha ka ba ka kyñnoh ka ba nyngkong ka sdang na u **Kr.....** . Ki ba shi kyñnoh te ki bun, e.g. **kriah**, **kria**, **krai**, **krew**, **krei** etc. Ki ba ar kyñnoh te imat don tang kito ki ba sdang da u **Kyn-**, bad **Kyr-**, e.g., **kynton**, **kyntiew**, **kyrtong**, **kyrpang**. Na ka daw ka jingbyndon **kr-**, ka shikor u Khasi u ba mynshuwa haba ka sngap ña ka kyñnoh **cric-**, ka iohsngew kumba ka long **kyr-**. (Hangne dei ban kdew ña ka jingshisha ba ki briew ki iohsngew ña ka ktien nongwei kat kum ka rukom ka ktien lajong). Ka kyñnoh ka ba ar pat **-ket** ka kylla **-kit** namar ba **-ket** ha ka ktien English ruh ka long hi **-kit** /**krikit**/. Nalor nangta, ka jingkyñnoh **-kit** ka long lypa ka ba kum ka kyntien **kit** ha ka Khasi, kum **kit khia**, te kumta **-ket** ka shu sah hi **-kit**. Haba kyñnoh ña ka kyntien **cricket**, u **-c** u ba ha shuwa u **-k** um shah kyñnoh ei ei.

Ka jingkylla jong ka kyntien **catechist** (ka ba mut u nonghikai ña ki jinghikai shong tynrai) sha **Ka Kot Tikir** ka long na kine ki daw. Nyngkong ngin phiah ña kane ka kyntien **catechist** /**kə tɪkɪst**/ ha ki lai kyñnoh: **kə**, **tɪ**, **kɪst**. Ka kyñnoh ka ba nyngkong ka kylla kot, kata **kə** = kot na ka

daw ba ĩa ki jinghikai shong tynrai la shon ha ka kot ha ka dur ki jingkylli bad jubab. Ha ka jaka ban don da u nonghikai la shim ĩa ka kot kum u nonghikai. Ka kynnoh ka ba ar **ti** ka sah beit kumto namar **ti** ka ĩajan bad kiwei ki kyntien Khasi kum tidew, tiduh: hynrei **kɛst** ka kylla **kir** namar ar tylli ki daw. (i) Ha ka Khasi ym ju don kyntien ba kut ha u **-s**. Ha ka pateng ba kham mynshuwa ne wat haduh mynta hapdeng jong ki briew ki bym da shong skul bha u **-s** u ba ha ba kut ka kyntien u kylla sha u **-l** lane **-r** lane **-d/t**. Ngı dang lah ban ĩohsngew haduh mynta kumno ka **bos** ka kylla **bod/bot**, **jls** kylla **jlir/jlil**. Ha kajuh ka rukom u **-s** na ka kynnoh **kɛst** u kylla **-r** bad kumta **kɛst** ka kylla noh **kɛrt**. Hadien kine ki jingkylla ka kyntier: **kæ tɪkɛst** ka kylla noh **kot tɪ kirt**, Ka jingkylli ka ba mih mynta ka long shano u jah u **t** u ba nadien u **-r**. Ka jubab ĩa kane ka jingkylli ka long ka daw ka ba ar balei **-kɛst** ka kylla **-kir**. (ii) Ha ka ktien Khasi ym ju don satia kano kano ruh ka kyntien ka ba kut ha ar tylli ki konsonan. Wat u **-ng** u ba i kumba u don ar tylli ki konsonan, pynban u dei tang u wei u konsonan. Ha ki dak phonetik la thoh ĩa u **-ng** kumne: /ŋ/ Namar ba kam long ka rukom Khasi ban don ar tylli ki konsonan, u **-t** u ba bud ĩa u **-s** (ba la kylla **-r**) u shu shah ĩelnoh kumto, bad kumta **-kirt** ka shu sah nong tang **-kir**. Hadien ba **kæ tɪkɛst** ka la kylla **Kot Tikir**, u Khasi u ba mynshuwa u pyndonkam sa kawei ka aĩn Khasi halor kane. Kane ka aĩn ka long ba kawei pa kawei ka **Third person Noun** ka dei ban shah laun khmat ha ka Noun Marker **u/ka/i**. Ka kyntien **kot** ka dei ka **Third Person Noun** namarkata ha shuwa jong ka dei ban don ka noun marker **ka**, bad kumta **Catekist/kæ tɪkɛst/** ka kylla long **Ka Kot Tikir**.

Ha ka jingpule lingkwistik don ka jingpyniapher ĩa ar jait ki rukom pule: **Daikhronik** (Diachronic) bad **Synkhronik** (Synchronic). ĩa kine ki kirteng la pyndonkam nyngkong eh da u Ferdinand de Saussure (1916) u stad lingkwistik na Switzerland ĩa u ba la tip ruh kum u nongseng ĩa ka jingpule lingkwistik ha kine ki sngi. Haba ka jingpule ka long daikhronik, ĩa ka ktien la pule/peit kum ka jingpule ba dei ĩa ka histori jong ka. Kata ka mut, la pule ĩa ka na ka liang ka jingsan jingroi, ka jingkylla ruh ha ka jingĩaid, ka por. Kumta ka ĩohi ĩa ka jingjah jong kiwei ki kyntien bad ka jingmih da kiwei pat ki ba thymmai, ka sur kren ka pher na kawei ka por sha kawei pat. Ki briew ki ba pule ĩa ka histori ka ktien English ki ĩohi ba ka English ha ka por u Chaucer

ia ka ba la tip kum ka Old English ka pher na ka English u Shakespeare. kunjuh ruh kane ka pher na ka English ba kren ha kine ki sngi. Ka jingpule lingkwistik haba ka long daikhronik ka peit lut ia ki bynta baroh jong ka ktien, kata ki jingkylla ki ba don ha ka phonoloji, morpholoji bad ruh syntak lyngba ka por.

Synkhronik pat ka pher namar ka peit ia ka ktien na ka liang ka jingpyndonkam ia ka da kita ki ba kren ia kata ka ktien ha ka pateng/por ka ba thikna. Kane ka mut ba ka jingwad bniah ka long ban iohi bad sngewthuh kumno ka jingpyndonkam ia ka ktien ha kawei ka pateng (e.g. 1920-30) ka long lane ka pher na kawei pat (e.g. 1970-80). Lah ban nang pynkxim shuh ia kane ka jylli da kaba kdew ba ka jingpule ka long kyrpang ia ka jaka ba shong kita ki briew, e.g. Ka Khasi ba kren ki nong Sohra ba shong ha Shillong ha ka snem 1920-30.

Kane ka jingpyniapher ia ka **synkhroni (synchrony)** ne ka **daikhroni (diachrony)** ka lah ban pynpyrkhat ia ki katto katne ba kine ar kim long shuh ki ba don jingladei. Hynrei ka jingshisha ka long ba kine ar ki pyndap kawei ia kawei ha ki rukom ki ba pher. Ka ba nyngkong eh ka long ba ym lah ban ai ka jingpule ia ka histori (daikhronik) jong ka ktien lynda la don shuwa ka jingpule ka ba thikna ia ka rukom pyndonkom ia ka ktien (synkhronik). Ka jingkylla ki kyntien, ka jingshim kyliang na kiwei pat ki ktien, ki long ki bynta ka synkhroni, hynrei kine hi kijuh ki bynta ki long shi bynta na ka histori jong ka ktien. Kum ka nuksa, ngi lah ban ong ba ka jingwan rung ki kyntien **tibi** bad **telibishon** ha ka Khasi ka sdang ha ka snem 1982 ha ka por ka Asian Games ka ba la long ha Delhi. Kane ka long jingpule daikhronik. Hynrei ka jingpule, kumno kine ki kyntien ki wan rung kynsan ha ka 1982, kumno na ka T.V. ka kylla **tibi** bad **television** sha **telebishon**, kiei ki jingmut jong ki. Kane ka long ka jingpule synkhronik lingkwistik.

Ha ki kot lingkwistik jong kane ka spah snem, khamtam naduh u Ferdinand de Saussure, haba kren shaphiang ka lingkwistik thiori (linguistic theory) ka jingkdew ka long ia ka lingkwistik ba dei synkhronik. Kane ka long namar ba la pdiang salonsar ba ka jingpule lingkwistik ka dei ban long khamtam eh na ka liang kumno ia ka ktien la pyndonkam. Ka jinglap bad jingbatai kumno ki briew ki kren ia kawei ka ktien (e.g. Khasi) ha kawei ka pateng (e.g., 1950-80) ka dei ka lingkwistik na ka liang ka synkhroni. La tip ruh ia kane kum ka **Deskriptib lingkwistik** (Descriptive Linguistics). Ha

shuwa ba ka deskriptik lingkwistik kan long ka ba la pdiang paidbah da ki stad lingkwistik la pyrkhat, khamtam ha Europe ba ka ktien ka ba khraw tam,, ka ba shai tam bad ka nongmuna ia kiwei pat ki ktien ka dei ka Latin. Kiwei pat ki ktien bym dei Latin, ne bym don jingladei ei ei bad ka, ki long ki ktien riewkhlaw. Namar ba ka Latin ka don ki **article**, la khmih lynti ba kiwei pat ki ktien ruh ki dei ban don **article**. Ka ktien English ka long ka ktien ka ba shai namar ka don **article** kumba don ka Latin, hynrei ka Russian ka dei ka ktien riewkhlaw namar ha ka ym don **article** satia. Haba kane ka jingpyrkhat ka synshar ia ki stad lingkwistik, ka jingpyrkhat ba ka ktien thoh ka dei ban long ka rukom jong ka ktien kren ruh ka synshar. Hynrei ynda la mih ka deskriptik kine ki rukom pyrkhat ki la duh noh, bad ha ka jaka jong ki la mih noh da kiwei. Ki jingpyrkhat ba thynmai, ki long: (i) Kano kano ka ktien ka long ha ka hi ka ba khraw, ka ba shai bad ba biang na ka bynta ki jingdonkam jong kita ki briew ki ba kren ia ka. Kam long ka ba donkam ba kawei ka ktien kan bud ia ka rukom jong kawei pat ka ktien. Ka ktien kam long ruh ka ba duk ne riewspah na lade hi. Don bun napdeng ki Khasi ki ba ong ba ka ktien Khasi ka duk. Hynrei lada ngi pyrshang ban sngewthuh bha ia kane ka jingong, ngin shem ba ka long ka jingong ka ba bakla. Ia kiei kiei ki ba long Khasi ha ka jingdonkam, kat kum ka imlang sahlang u Khasi ka ktien Khasi ka long ka ba riewspah. Peit ia kine ki kyntien: **bta, sum, sait, sleh, khlieng, phler, sawar** ha ka ktien English lah ban ong tang da kawei ka kyntien: **wash**. Ia ka kyntien English **cut** ha ka Khasi lah ban ong da ki kyntien ki ba bun bad pher kumne: **ot, pom, shaiñ, thoh, thlieh, mait, pharia, khud** kat kum ka jingsngew donkam uta u nongkren. Ka jingduna jong ka ktien Khasi ka long ha ka liang ki tiar thymmai kiba wan mih bad ki jingmut (ideas) ki ba thymmai. Ynda haba ki jingput jingtem kim long shuh tang da ka **mieng, ka tangmuri** bad ka **nakra** la dei ban don sa ka duitara, ka **kaitar** bad ka **piano**. Ngì shim kyliang na kiwei. Ka jingshim kyliang kam dei ka dak ka jingduk hynrei ka dak jong ka jingim, bad ka jingim jong ka ktien Khasi ka paw khamtam eh ha ka jinglah jong ka ban buh ia kito ki kyntien shim kyliang hapoh la ka Kramar nalar ba ka ai ia ki ka dur ka dar Khasi. Khmih bha ia kane ka nuksa.

Une u **breik** jong kane ka **taksi** um da long bha. Ngan phah **riper** noh ha **workshop** u Deng. Ieh un shna haduh un da **bes** syndon.

La ju ong ba ka English ka long ka ktien ka ba riwspah. Hynrei ka jingriwspah jong ka ruh ka long namar ba ka la shim kyliang na jan baroh ki ktien ka pyrthei, na ka Latin, French, German bad na baroh ki ri ha ki ba ka Sorkar Bilat ka la synshar. Dang shen, ka English ka la roi sa da ar tylli ki kyntien **glasnost** bad **perestroika** na ka Russian namar kine baroh ar ki la long ki jingpynrung thymmai ha ka Oxford English Dictionary.

Kawei pat ka jingpyrkhat ka ba thynmai ka long ba ka ktien jong kawei ka jaidbyntiew kam donkam ban bud ia ki rukom jong kano kano kawei pat ka jait ktien. Kane ka mut ba ka ktien kum ka Khasi kam donkam ban don **Present Tense** lane **Adjective** tang namar ba ka English ka don. Ka jingbyndon **Present Tense** ha ka rukom ka ba thikna kam pynlong ia ka Khasi ka ba kham poh ban ia ka English; ne ka Russian kam shym kham poh ia ka English namar ba kam don **definite article**. Ka **Verb** ha ka Khasi kam don jingkylla ei ei na ka liang ka **Person**, kumta ruh ka long ha ka Norwegian. Ia nujor ia kine, phin shem ba lait noh na ka English, ka Khasi bad Norwegian ki ia syriem bha.

	Khasi	Norwegian	English
I Person	Nga wan	jeg kommer	I come
II Person	Me/pha/phi wan	du kommer	You come
III Person	U/ka/i wan	han kommer	He comes

Kane ka rukom pule shaphang ka jinglong kyrpang jong ka ktien ka wan rah ia ka jingriyngkat dor hapdeng jong ki. Ka pyniar ruh ia ka jingpule nalar ka Latin, Greek, French, German, English, sha ki ktien ha South East Asia, Africa, Pacific Islands, bad kiwei kiwei.

Ka jingthmu ba kongsan eh jong ka deskriptib lingkwistik ka long ban ai ka kramar jong ka ktien kat kumba la pyndonkam ia ka. Kane ka mut ba lada ki ba kren ia ka ktien ki ong **It's me**, ka Kramar ruh ka dei ban ong **It's me** ka dei ka jingong ka ba beit ba biang bha. Kam dei ban pynkylla bad ong ba **It's I** ka long ka ba beit katba **It's me** kam long. Ha ki jinghikai ha skul la khmih lynti ba ki khynnah kin jubab dap ia ki jingkylli kumne: **Phi itynnad ia une u syntiew? Hooid, nga itynnad ia une u syntiew.** Lada ki khynnah ki thoh tang **Hooid**, ki nonghikai kim ai mak namar ki ong, ka jubab kam biang. Hynrei ha ka jingiakren ba man la ka sngi ym ju don ba jubab **hooid**,

nga itynnad ia une u syntiew; ka jubab ka long beit hooïd ne em. Ka Kramar ka ba pdiang ia ka jubab lyngkot (**hooïd ne em**) ka long ka deskribtib Kramar hynrei ka byn pdiang ia kane, kata ka ba kwah ba ka jubab ka dei ban long ka ba dap, ka dei ka **preskriptip** (prescriptive) **Kramar**. Ha kane ka juk jong ka deskribtib Kramar ka preskriptib Kramar kam da leit siew shuli.

Kawei pat ka tnad jingpule lingkwistik ka long ka **Komparetip** (comparative) lingkwistik. Kane kam da plier eh na ka historikal lingkwistik. Ha ka jingshisha ka long hi kajuh tangba ha kane la pule ym tang ia kawei ka ktien hynrei ia kiba bun ki ktien na ka bynta ban ia nujor ia ka jingïadei hapdeng jong ki. Ha ka spah snem ba khadkhyndai ia ka Komparetib lingkwistik la tip kum ka Komparetib Philoji (Philology). Ka jingshem ia ka Sanskrit da u W. Jones (iap 1794) ka la pynlah ia u Franz Bopp (1816) ban kdew da ka ba ia nujor, ba ka Sanskrit. Latin bad Greek ki long ki ktien ki ba dei na kajuh ka kur. Ka jingïanujor ki ktien ha South East Asia da u Pater Schmidt (1906) ka pynpaw shynna ba ka ktien Khasi ka don ka jingïadei ka ba jan bad khadwei tylli ki ktien kumne: Khasi, Palaung, Mon, Khmu, Vietnuong, Katu, Bahnar, Pear, Khmer, Jaha, Seno, Semala. Kine ki ktien ki hap lia ka iing ktien Monkhmer ka ba dei na ka iing Austro-Asiatic. Ha ka Vol. 2 jong ka **Linguistic Survey of India** na u Grierson, ngi iohi ba la nujor ia katto katne ki kyntien Khasi bad kitei kiwei pat ki ktien, bad katno ngin sngewphylla ba ka Khasi ka ia syriem bad kito kiwei pat.

Ha ka Komparetib lingkwistik don bun ki jingshem ki ba la kylla long ki aiñ ktien e.g. Ka Grim's Law. Kane ka ong ba ka jingkylla ka long borabor kumne :

1.	p	kylla	f	e.g.	Latin	pater	kylla	English	father
	t	kylla	th	tenuis	thin
	c								
	lane k	..	h	cornu	horn
2.	d	kylla	t	..	Latin	duo	two
	e	..	i	ed	eat
	a	..	ei	ager	acre
3.	bh	kylla	b	..	Sanskrit	bhrâtâ	brother
	dh	..	d	Vidhava	widow

Ha ka jingpyntrei kam ia kine ki aiñ la shem ba don ki khép ha ki ba kine kim iaïd kam, bad kumta la sngew dei

ban pynmih da kiwei pat ki aih̃., e.g. Ka Verner's Law ka ba kdew ba u **-t-** um kylla **-th-** ha ki por baroh, e.g.

Latin **sta:** English stand

Latin **est:** German ist

Kine ki nuksa ki pyni ba lada u **-t** u wan nadien u **-s-** ka aih̃ u Grimm kam trei kam.

Ka **Sosholingkwistik** (sociolinguistics) ka dei kawei pat ka tnad pule ka ba peit ia ka jingia dei hapteng ka ktien bad ka imlang sahlang. Ka peit ia ka jinglong kyrpang jong ki briew kat kum ka ktien ba ki kren. Ka ktien ba ki briew ki kren ka pynpaw ia ki jingsngew jong ki halor ki kam, ki jingjia, ka kyrdan jong ki ha ka jingnang jingstad bad jingioh jingkot. Nangta ka peit ia ka ktien ka ba ki ong ka **Standard language** lane ka ktien thoh bad haduh katno kane ka ia pher na kiwei pat ki bym dei ktien thoh. Ka sosholingkwistik ka kynthup ia ka **ethnolingkwistik** (ethnolinguistics) bad **anthropolijikal** (anthropological) lingkwistik. Kane ka ba nyngkong ka peit ia ka ktien ha ka jingia dei bad ki jaidbynriew ki ba rit paid, kumno kine ki rit paid ki pher na kiwei ha ka rukom leh bad ktien, kumno ki kren bad leh para ma ki ne bad kiwei pat ki heh paid ba don lang bad ki. Ka jingpeit bniah ka kynthup ia ka rukom ieng/shong (posture) bad rukom pynkhih ia ka khlieh, kti bad khmut/khmat (gesture), ka rukom peit bad sur kren ki ba ia id ryngkat bad ki jingkren. La peit bniah ia kine khnang ban sngewthuh kumno kine ki briew ki pynbang pynthiang ia ki jingkren jong ki.

Ka anthropolojikal lingkwistik pat ka peit ia ka ktien bad kiei kiei ki ba ka pynpaw shaphang ki briew na ka liang ka niam ka rukom, ka kñia ka khriam, ka kheih̃ kur kheih̃ kha, ki kyntien khot (**e.g. mei, pa, kong** etc.) ia ki ba don jingia dei bad bym don jingia dei (kinship terms bad terms of address). Kane ka jingpule ka wad bniah ia ka lynti ia id jong kano kano ka jaidbynriew ha ka liang ka imlang sahlang, ka kolshor ka ba sop ba spañ lang ia ka kum kawei ka jaidbynriew. Kane ka mut, namarkata, ba lada ngi ong ba ki Khasi ki long ki briew ki ba don akor, dei ban pynshisha ia kata ym tang da ki jingleh hynrei da ka ktien ba ngi kren ruh.

Ka don sa kawei ka tnad jingpule ba la tip kum ka **Aplaid** (applied) lingkwistik. Kane ha ka jingshisha ka kynthup ia baroh ki bynta ka sosholingkwistik, hynrei ha kine ki sngi la kham pyndonkam ia ka ban kdew kyrpang ia

ka jingpule lingkwistik ha ka jingiadei bad ka jinghikai ia kano kano ka ktien. Kane ka kham ia dei badki jinghikai ba la tip kum **Foreign Language Teaching (FLT)**, **Second/English Language Teaching (SLT/ELT)**. Ha ki nongbah kum ka Delhi bad Bombay ka FLT ka leit siew bha ha ka kam kum ki nongpynkylla ktien(interpreter) ia ki toris bad briew sorkar ba wan na kiwei pat ki ri. Ka SLT bad ELT ka iaidei kam bha hapteng ki nongikai ha skul, college bad Language Institutes. Hangne la hikai ia ki nongrim ba kongsan ba dei ban bat ha ka ba hikai, ki rukom hikai bad kumno ban sngew/peit ia ki jingbakla (error) ba ki nongpule ki pynpaw na kawel ka por sha kawel pat.

Hapoh ka aplaid lingkwistik, don sa ka **Kontrastib** (Contrastive) lingkwistik. Ka jingwad hangne ka long ia ka jingiapyrshah hapteng artylli ki ktien bad kumno kine ki jingiapyrshah ki khang lad ia ki nongpule ban nang ia kawel ka ba ki dei ban nang. Kum ka nuksa, shiin ia ka KHasi bad English, bad ia ki nongpule ki ba dei ki Khasi ba kwah nang English. Lah ban shem ba kita ki nongpule kim lah satia ban pyndonkam beit ka **Subject-Verb Concord** ha ka English, kata kim lah satia ban kynmaw ba ka **Verb** ka don **-s** nadien lada kata ka **Verb** ka dei ka **present tense**, bad lada ka **subject** ka long ka **Third Person Singular Number Noun** e.g., **he comes**. Kita ki nongpule ki shu ia thoh bad ia ong hi ***he come**. Ka jingkylli balei ka long kumne wat hadien ba la hikai shi hikai ia kane ka mih. Ka Kontrastib lingkwistik ka batai ba kane ka long namar ba ki nongpule ki rah ia ka jinglong ka ktien Khasi sha ka English kumne: ha ka Khasi, ka Verb kam don jingkylla ei ei la ka subject ka long kano kano ka **person** ruh. Ki nongpule ki shim ba ka long kumjuh ha ka English ruh bad dei namar kane ka daw ki ia thoh ***he come** ha ka jaka **he comes**.

Ha ka aplaid lingkwistik la shu shim lut ia ki jingbatai shaphang ka ktien na ka deskriptip lingkwistik bad la pyndei ia kita ki jingbatai sha ka ba hikai ia kata ka ktien.

Ka **Salkholingkwistik** (Psycholingkwistik) ka wad ban sngewthuh ia ka jingiadei hapteng ka jingiakren bad ki jingpyrkhat hapoh jong u nongkren. Ka jingkren ka long ka ba lah ban iohsngew, thew bad iohi, hynrei kiei ki jingpyrkhat hapoh u nongkren ki ba pynlong ia u ban kren ia ka ba u kren. Hapoh u briew don ka jingkyinmaw (memory), ka jingpynleit jingmut (attention), ka jingsngewthuh ia kiba u shem ne iohi (perception), ka jingpynwan dur ia ka

jingsngewthuh (conception), ka jingkwah ban tip ban nang (learning). Kine baroh ki ia trei lang ban pynlong ia u briew ban kren. Nalor kine ka Saikholingkwistik ka peit bniah ruh sa ia kiwei pat ki daw ki ba pynlong ia u ban kren ne ban ym kren. Ka jingbym sngewthuh bha ia ka phang ka jingiakren, ka jingghan ha la ka jingmut (planning), ki rukom pyntrei kam ia ka bor kren (strategy) da ki khunlung, kumno ki khunlung ia ki ba ym shym la hikai lut ia baroh ka ktien, ki nang ia ka tang ha ki khyndiat snem ki long ki phang pule jong ka Saikholingkwistik. Ka jingwad bniah halor ka jinglah ki khunlung ban kren ia kano kano ka ktien ka ba ki iohsngew la ka long ka jong ki kmie ki kpa, jong kito ki ba ri ia ki, bad jong ki para khynnah (lada kine ar hadien ki pher na ka jong ki kmie ki kpa) ka la roi mynta kat haduh ba la mih kawei ka tnad jingpule kyrpang tang ia kane hi bad la tip ia kane kum ka Eksperimental Saikholingkwistik.

Ban peit bniah halor ka jingtapher u mrad na u briew ha ka liang ka jingnang ban kren ka la pynlong ia katto katne ki riwstad ka ri America ban ri slem slem bha ia ki tngaw (Chimpanzee) bad ai jinghkai ia ki ban kren. Hynrei ka jingshem ka long ba ym lah ban thew janai ia ka bor thaw sentens (creativity) jong ki kumba ka long bad u briew, namar kine ki tngaw ki lah ban pynpaw tang ba ki sngewthuh ia ki jingbthah hynrei ba da lade hi kim lah ban pynmih ktien lait noh tang kito ki ktien ia ki ba la hikai.

Nalor kitei haneng don run sa ka Kompiwteshonal (Computational) lingkwistik. Kane ka long ka jingpule ba dei ia ka jingkheif jingdiah bad rukom trei kam ka Kompiwtar ha ka ba la thew ia ka jingsawa haba kren. Kane ka ia'id kam ha kito ki jingkylla ktien (automatic translation) ba leh da ka Kompiwtar, bad ha ka ba thaw **Concordance**.

LYNNONG 2 KA PHONETIK BAD PHONOLOJI

Ha ka bynta ka ba nyngkong, ngi la peit ia ka jingmut jong ka kyntien lingkwistik kum ka jingpule bad ia ki bynta ba pher jong ka. Ha kane ka lynnong pat ngin peit ia kita kiei kiei (elements/components) ki ba long ki bynta (internal parts) jong ka jingpule lingkwistik.

Ki bynta ki ba nyngkong ch ki long ki jingsawa (sounds). Haba ngi kren ia ka jingsawa, ngi kren ia ka jingsawa ka ba mih haba u briew u kren, ym kumba sawa ka kshaid, ne kumba kynud u ngap, ne pah ki slirieh. Ka jingsawa ka ba mih haba u briew u kren ka pher na kiwei pat ki jingsawa bym dei haba kren. Shisha lada ym don jingiapher hapdeng kine, ngin ym ioh ia ka jingpule lingkwistik, bad phi kum ki nongpule, phin ym pule satia ia kane.

Ka jingshisha ka ba khraw ha ka jingiadei bad ka ktien ka long ba la pynlong ia ka da ka jingiasnoh lang ki jingsawa ka jingiasnoh ka ba long kat kum ki aiñ ba don ha kata ka ktien. Kine ki aiñ ki long kat kum ka jingiamynjur lang jong ki briew ki ba kren ia kata ka ktien. Dei naniar kane ka daw ba u Bloch bad u Trager ha ka *Outline of Linguistic Analysis* (1942), ki ong "A language is a system of arbitrary vocal symbols by which a social group co-operates." Ka dur ka ba paw shabar jong ka jingiasnoh kine ki jingsawa ka ai ki kynnoh bad jingmut ki ba pher ba pher. Mynta ngin peit nyngkong kumno kine ki jingsawa ki ioh ia ki dur ki ba pher ba pher. Ha ka snem 1886 kawei ka kynhun riewstad ba dei ia ka jingsawa ki ktien ba pher jong ka Europe ki la pynlong ia kawei ka seng ka ba kyrteng ka **International Phonetic Association (IPA)** ban pyniaid shaphrang ia ka jingpule phonetik. Ha ka snem 1889, kane ka seng ka la thaw ia ki dak kum ki dur jong ki jingsawa bad ia kine ki dak la khot ki **International Phonetic Alphabet** lane **IPA Symbols**. Ia kine ki IPA symbols la pyndonkam haduh mynta ban thoh ia kano kano ka ktien kat kum ka jingsawa ba don hangta. Ka jingiadei hapdeng kine ki dak bad ki jingsawa ia ki ba ki ieng ka long ka ba la shu buh la ka buh kat kum

ka jingsngewbit jong kane ka seng. Kam da don kano kano ka daw ka ban pynlong ia ki ban thoh /a/ ia u jingsawa uba kut ha ki kyntien **da, la, na, ja** etc. Ban pyniapher ia kine ki dak IPA na ki dak Roman la thoh ia ki dak IPA hapdeng artylli ki laiñ kynriang kumne / /. Ia ki dak IPA lah ban ioh ha ka kot u A.C. Gimson *An Introduction to the Pronunciation of English*. Longman (1970). Ka jingbyndon jingiadei hapdeng ki dak bad ki jingsawa ka pynlong ia kiwei ki bym mon ia kine ki dak ba kin thoh hi la ki jong. Hyurei na ka bynta ka jingryntih bad ka jingpyndonkam salonsar ha ka liang ki dak, ki ba bun ki stad phonetik ki shu pdiang ia kine ki dak kumba ki long. Lada don katto katne ki ba pyniapher, ka jingpyniapher kam long shibun, bad ka jingpyniapher ka long tang kum ban pynbha ia ka rukom thoh, kata ruh halor ki nongrim ba thikna ba ki don.

Ia ka **Phonetik** ka jingpule ka long ban wad, peit ne sngap thuh ia ki jinglong (characteristics) jong ki jingsawa ki ba mih ha ba ki briew ki kren; hadien kata ka jingpule ka long ban at ka (1) Jingbatai (Description). (2) Jingpynbynta (Classification) bad (3) ban buh ia kata ka jingsawa ha ki dak (IPA symbols); kane ka kam ka long kata ka ba ngi ong ka **Transcription**. Hapoh ka jingpule **Phonetik** lah ban don kine ki tnad jingpule.

Artikuletori (Articulatory) Phonetik: Ka long ka jingpule shaphang kumno ia ki sur sawa ba kren ki briew la pynmih/pynsawa (articulate) da ki **vocal organ** kata da ki tor ban pynmih ia ka lyer, da ki **bokal kod (vocal cord)** ne bynta doh stang ha pdot, da u thylliej, ki bniat, ka shyntur baroh kawei bad ki rymniang shyntur.

Akustik (Acoustic) Phonetik: Kane ka wad kumno ki sur sawa ka jingkren ka ba mih na ka shyntur u nongkren ka long ia ka ba la iohsngew da ka shkor. Kiel ki jinglong jong kine ki jingsawa ki ba pynlong ia ki ba lah ban iohsngew.

Oditori (Auditory) Phonetik: Kane pat ka wad ban sngewthuh ia ka bor iohsngew ia ka ktien (perceptual response) kat kum ka jingtrei kam ka shkor, ki thied ki ba pyniasnoh ia ka shkor bad ka jabieng.

Ban pule ia kano kano na kitei ki tnad jingpule lah ban pule hapoh kawei ka kyrteng: **Instrumental Phonetik** namar ba kine ki pyndonkam ki tiar ki tar (apparatus) ban thew ia ka jingbun ka lyer ka ba mih na ki tor, ban thew bad khmih bniah (analyse) ia ka lyer ka ba kit ia ka jingsawa (sound

waves), ban peit katno u thylliej u rah shajrong hapoh ka tnum jong ka shyntur (hard palate), kano ka bynta jong u thylliej ka ba rah ne dem hapoh shyntur bad kumta ter ter.

Haba ki stad phonetik ki batai ia ki jingsawa ka jingkren, ki pyndonkam ia ki kyrteng na ka saian ba dei ia ki dkhot met (briew) (anatomy) bad na ka saian ba dei ia ka jingsawa (acoustics). Namar ba ka jingbatai, jingpynbynta ia ki jingsawa ka long ka ba ia dei ym tang ia kawei ka ktien, hynrei kyllum ia baroh ki ktien ha ka pyrthei, la khot ruh ia kane ka jingpule ka **Jeneral (General) Phonetik**. Ka Jeneral Phonetik ka long namarkata ka jingpule ha ka ba ka jingthmu ka long ban lap ia ki nongrim (principle) kyllum jong ki ktien ka pyrthei, ki nongrim ki ba kdew shai ia ka jinglong bad jingpyndonkam ia ki jingsawa ha ba kren. Kane ka mut ba ka jingbatai na ka Jeneral Phonetik shaphang uno uno u sur sawa e.g., /b/ la u long ha ka ktien Khasi ne German, ka long kyllum ka ba dei ba u/b/ u dei u **bilabial plosive** (kata, u jingsawa u ba lah ban pynmih da ka ba pyniakynduh lang ia baroh ar tylli ki rymmiang shyntur ha kata ka rukom ba ka lyer na ki tor ka long ba la set da ka ba kbum bad hamar ba ong artad /b/ kum ha ka kyntien **bam**, ka lyer ka mih kynsan buk).

Ia ka jingpule ba dei ia ka jingsawa kyrpang jong kawei ka ktien e.g., English, Khasi etc. la pule hapoh ka tnad pule ba la ong ka Phonoloji (Phonology). Na ka bynta ki jingbatai bad jingpynbynta ia ki jingsawa, ka Phonoloji ka shaniah ha ka Jeneral Phonetik hynrei ka ai ki jingbatai kham bniah bad kdew ia ka jingapher jong ki jingsawa kat kum ka jingpyndonkam ha kawei ka ktien. Kane ka mut ba ka phonoloji ka kdew ba u /p/ u ba don ha ki ktien Phareng bad Khasi u ia pher ha ki katto katne ki liang. U /p/ ha ka Phareng haba u don haba sdang ka kyntien u long **aspirated**, kata, don bad ka jingsawa ba rit ba syriem ia u/h/ Kumta haba kynnoh ia ka kyntien **pen** ha ka Phareng ka jingsawa ka long syriem kum /**p^hen**/. Kane kam long satia kumta ha ka Khasi, kata u/p/ ha ka kyntien Khasi ha ka ba sdang ka kynnoh ne kyntien um long **aspirated**. Ka jingapher ka phonetik na ka phonoloji ka long kane: ba ka ba nyngkong ka pule kyllum shaphang ki jingsawa ha ka jingkren ki briew ki ba nangno nangno ruh, bad ki ba kren ia kano kano ruh ka ktien; ka ba ar pat ka pule beit thik tang ia ki jingsawa ha kawei ka ktien. Kane ka jingpynapher ka la sdang ha ka por jong ki lingkwis ia ki ba la tip kum ki **Prakyian lingkwis**

(Praguean linguists). Mynta ngin peit sa khyndiat ia ka Phonetik.

Ha ka jingpule Phonetik, ka long ka ba donkam ba ngin sngewthuh katto katne shaphang kiei kiei ki ba jia ha ka met u briew (naduh ki tor haduh ka shyntur/khmut etc.) haba u kren. Ngì dei ban sngewthuh ba ka ktien (jingkren) ha ka ba pynmih ia ka, ka long ka jingmih ka ba bud (by-product) na ka jingring bad jingpynhiar mynsiem. Ha kiwei pat ki kyntien, ka jingring bad jingpynhiar mynsiem ka long ka ba donkam eh ba u briew u dei ban leh. (Lada um leh ia kane un iap). Bad kumta ha ka ba u kren nyngkong u pyndep ia kane ka jingdonkam ba kongsan eh jong u, (kata ring/ pynhiar mynsiem): bad nangta u sa pyndep ia ka jingkwah kren jong u. Ki ba bun ki jingsawa ha ka jingkren ki long ki ba la pynmih da ka lyer ka ba mih na ki tor lyngba ka shyntur bad khmut. To ngin ia peit ia ki bynta ha ka met u briew ki ba u pyndonkam ha ka ba kren.

Ki Bokal Kod (Vocal Cords) ha u Pdot

Ka lyer ka ba rung sha ne mih na ki tor ka iaïd lyngba u tangkro sha u pdot. Hapoh u pdot don ki kynja doh ba stang hir hir ba ker kum ki pyrda. Ia ki la tip kum ki **bokal kod** (vocal cords). Kine ki long ki ba stang bad jem, bad lah ban ring kysit ia ki kat ban khang ia ka jingmih ka lyer na shapoh. Kane ka long khamtam haba kan mynsiem. Lah ban pynjem ia ki bad khylliap sha kynriang khyndiat kumta ba ka lyer nabar ne napoh ka lah ban iaïd lyngba khlem jingpynwit. Haba don ka jingjyrhoh ne haba ong ia ki kyntien kum **lyoh; pyoh, bhoh** ki ba kut ha u **h** ia ki bokal kod la khyñniat da ka lyer na shapoh, bad kane ka pynmih ia ki jingsawa ba la khot **glottal stop** bad ia u ba ha ki dak phonetik la thoh/?/ Haba ka lyer na shapoh ka khyñniat ia ki bokal kod, ka don ka jingkad ia ki la kum ba plie ia ka jingkhang. Ia kane ka jingplie khyndiat la ong ka **glottis**.

Ki bokal kod ki lah, kumba la ong haneng, ban kah ia ka lyer, bad haba ka lyer ka ba na shapoh ka iaïeh ban mih, ka pynmih ia ka jingkhynñiuh jong kine ki bokal kod. Ka jingkhynñiuh ka ktah ia ka sur sawa jong ki jingsawa haba kren, bad ia kane ka jingktah (effects), kata, ka jingiapher u jingsawa haba don jingkhynñiuh la khot **Bois** lane **Boising** (voicing). Kane ka Bois ka don ha man la ki ktien ka pyrthei. Ha ka Khasi ngi shem ba ka don ha ki

jingsawa kum /b/, /d/, bad kiwei. Ki don kiwei pat ki jingsawa ki bym da ïaid ryngkat bad ka jingkhynñih ki bokal kod, bad haba ka long kumne la ong ïa kito ki jingsawa ba kim don Bois lane ba ki long **Boisles** (voiceless). Ki jingsawa ki bym don Bois ki long /p, t, k, s/ bad kiwei.

Ki bokal kod ki long ki ba donkam khamtam haba pasiaw. Kine ki kah katto katne ïa ka lyer na ki tor, tangba lyngba ka jingpyllait ka ba rit bha napdeng jong ki, ka lyer ka lah ban mih, bad ka sur ka long kumba pasiaw. Haba ym pasiaw ruh ki bokal kod ki lah ban long ha kane ka dur(pyllait tang khyndiat) bad ka jingsawa ka long kum haba ngi ong **haba, hangne**, ne ha ki kyntien ba sdang da u jingsawa /h/.

Ka Shyntur: Na ka bynta ban batai ïa ki jaid jingsawa ba pher ïa ka shyntur la peit khamtam na ka liang ka neng ne ka tnum jong ka. ïa kane la pynbynta ha ki lai bynta: (1) Ka **Hard Palate** - Kane ka dei ka bynta ha ka neng shyntur naduh nadien ka bynta ba khohruh khohram ka ba long ka jaka shong ki bniat haduh ha shuwa ba kan khun pynnoh sha pdot. (2) Ka **Soft Palate** - Kane pat ka dei ka bynta naduh ka khun pynnoh ha ka neng shyntur haduh ha ka bynta ka ba ha trai eh ka neng shyntur. (3) Ka **Uvula** - ka bynta ha tduh eh ka neng shyntur. Kane ka long ka bynta ka ba jem bad ka i kumba ka shu sdien. Hapoh ka shyntur don ki bniat. Ki bniat ki long ki ba donkam (nalar ka ba ktha ïa ka jingbam) ha ka jingpynmih ïa ki jingsawa kum /s/ lane /z/. Ka jaka hadien ki bniat ka ba lada twad sngewthuh ba ka long khohruh khohram. Ka long ka jaka ha ka ba ki tynrai bniat ki shong ïa kane la tip kum ka **Alveolar Ridge**. Kane ka bynta ka long ka ba donkam kum ka jaka ha ka ba u thylliej u tied haba pynmih ïa ki jingsawa /r, n, t, d/ bad kiwei. U thylliej hapoh ka shyntur u long u ba donkam eh ha ka ba kren. Ka shyntur, ki bniat, kim long ki ba lah ban pyndonkam ban kren lada khlem u thylliej. ïa u thylliej la pynbynta ha ki lai bynta: (1) Ka sla thylliej naphang tduh jong u (blade of the tongue). (2) Ka bynta ba hapdeng tangba ka ba la ong ka khmat (front of the tongue) bad (3) Ka bynta ba shadien eh shajan dohdah ne uvula (back of the tongue).

Nalar kitei haneng, ki rmiang shyntur ki long ki ba donkam ha ka ba pynmih ïa ki jingsawa kum /p,b,m,w/, /f/ bad /v/ bad/a, o, u/.

Ki Jingsawa kum Bowel (Vowel) bad Konsonan (Consonant)

Haneng la kdew ia ki bynta ka met u briew ki ba donkam, ha ka ba pynmih ia ki jingsawa haba kren. Kumno yn pyndonkam ia kine, yn sa kdew ynda haba la batai artad ia ki jingsawa kum ki Bowel bad Konsonan. Shuwa ba ngin peit ia ka jingiapher hapteng ki Bowel bad Konsonan ka long ka ba donkam ban sngewthuh ba ia ki jingsawa baroh la pyniapher na ka liang ka jaka ha ka ba u thylliej u ia tyngkhuh bad kano kano ka bynta ha ka shyntur, ne la um ia kynduh ne tyngkhuh ruh, u rah ne dem hamar hangno ha ka shyntur (place of articulation). Hangne ngi dei ban sngewthuh ba ha ka ba kren, u thylliej u khlih stet ban pynbiang ia ka jingdonkam pynmih jingsawa. Kaba ngi batai ia ka jaka tied u thylliej ha ka shyntur, ne kdew kano ka bynta u thylliej ka ba rah shaphang ka **hard** ne **soft palate** ka long na ka bynta uwei u jingsawa, hynrei namar ki kyntien ki long da ka jingiasnoh lang ki jingsawa, ki bynta u thylliej ki dei ban khlih stet bha ban pynmih ia baroh ki jingsawa ba donkam.

La shu kren kyllum ia ki bowel bad konsonan kum ki jingsawa. Mynta ngin pyniapher ia ki. Ki Bowel ki long kito ki jingsawa ki ba haba la pynmih ia ki, yn don kano kano ka jingkah ia ka lyer ban mih. Kane ka mut ba haba pynmih ia ki Bowel, ki bokal kod kim ia dait sbak, kata, ka lyer ka laid beit sak sak lyngba ka glottis. Ha ka shyntur, u thylliej um blok ia ka lyer da ka ba u rah pyntykhuh bad kano kano ka bynta jong ka neng shyntur. Ha kane ka rukom ka lyer lyngba ka shyntur ruh ka laid beit sak sak khlem jingpyuwit. Ngil ba batai ia ki bowel na ka liang ka jingiaid ka lyer.

Lah ban batai ia ki na ka liang ki rmiang shyntur bad ka jingrah ki bynta u thylliej shaphang ka neng shyntur. Na ki rmiang shyntur lah ban batai ia ki kum haba (a) Ki iar sha ki ngab (spread), (b) ki pyllon (rounded) bad (k) kim iar lane pyllon (neutral). Ngin kham lah ban sngewthuh ia kane lada ngi pyrshang ban ong ia ki katto katne ki bowel bad sngap thuh artad da lade kumno ki rmiang shyntur ki long/wan dur. Pyrshang ong **i li i im**; phin shem ki rmiang shyntur ki iar. Pyrshang ong, **u lu u um**; phin shem ki rmiang shyntur ki pyllong; pyrshang sa kane: **e de le** phin shem ba ki rmiang shyntur jong phi kim iar lane pyllon ruh.

Na u thylliej pat lah ban batai ia ki bowel kumne harum:
(a) Ka pdeng u thylliej ka rah shaphang ka hard palate;

haba ka long kumne, ki bowel ki long ki bowel khmat i.e., ba kham sha khmat ha ka shyntur). Ki nuksa ki long /ɪ iː, ʊ, ɪ, ə, ʌ/ ha ki kyntien **sim**, **seat** ha ka English. **ale**, **pə** kumba ong ki ong Mawreng, bad **sam** (ka ba pynpei).

(b) Ka dien u thylliej ka rah shaphang ka soft palate: haba ka long kumne, ki bowel ki long ki **bowel dien** i.e., ba kham sha dien ha ka shyntur). Ki ba kum kine ki bowel ki dei /aː, ɒ, ɔː, ʊ, u/ ha ki kyntien **bam**, **ot**, **ko**, **buh**; bad **cool** lane **pool** ha ka English.

Lah ban batai shuh ia ki bowel sa na ka liang ka jingdem ne jingjrɔŋ ka jingrah u thylliej. Ha ba pynmih ia bowel ngi dei ban kynniaw ba u thylliej um ia tyngkhuh bad kano kano ka bynta ka shyntur, hynrei u shu dem beit ha ka shyntur lane ki bynta ba pher jong u ki rah shaphang ka hard palate ne soft palate. Haba ong u thylliej u dem, ngi kdew ia kata ka jingdem sbok u thylliej ha ka tyngam poh (lower jaw) hamar ba ang ka shyntur ban ong/ aː/ kum **bam**. Hangne, ka jingkdew kam long ia ka jingdem u thylliej haba sei pynnoh artad sha tmoh. Haba u thylliej um rah sha jrɔŋ, hynrei baroh uwei u dem beit khop hapoh (kumba la batai sha khmat) ngi lah ban ioh ia ki **bowel tbian** kumne: /a bad aː/ ha ki kyntien **lam** lane **tam** bad **sam** (ai) lane **tam** (lum ia ka ba ha madan).

Don pat ki **bowel jrɔŋ** (kata ka bynta u thylliej ka rah jrɔŋ bha ha ka shyntur e.g., haba ka pdeng thylliej ka rah jan bha ia ka hard palate kumta ba ngi ioh ia ki bowel /ɪ, i, u bad u/ kum ha ki kyntien **bit**, **seat** ha ka English lane **phi** haba da ban bha ia u /ɪ/, **um** bad **fool** ha ka English.

Na ki jingbatai haneng, ngi iohi ba ka jingbatai kam pat kynthup ia ki bowel ki ba kham hapdeng. Ki **bowel pdeng** ki pher na kiwei ki bowel naba kim long ha khmat ne ha dien. Kim long ruh ha jrɔŋ ne ha tbian. Ka jingrah ka pdeng thylliej ka long tang kat ban shu don ha pdeng ha ka shyntur. Ki ba kum kine ki bowel ki long /ʌ, ə, ɛː/ kum ha ki kyntien **but** (ha ka English), **account** (ha ka English) bad **wer** lane **jer** ha ka Khasi.

Nalor ki bowel don ruh ki jingsawa ia ki ba la tip kum ki dipthong (diphthong). Kine ki dipthong ki dei hi ki bowel tangba bad ka jingtapher. Ka jingtapher ka long ba ha ki bowel, u thylliej u rah ne dem tang na ka bynta uwei u jingsawa (bowel) hynrei ha ki dipthong ka don ka jingrah stet (glide) ia u thylliej, na kawei ka jaka sha kawei pat ka

jaka (hapoh ka shyntur). Ka jingsawa kum /ei/ ka long u dipthong ha u ba u (thylliej nyngkong u rah shuwa ban pynmih /e/ bad kloï katba lah u rah shuh shuh kham shajrong ban pynmih /I/. Lada phin pyrshang ban ong /ei/ da ka ba ong shuwa /e/ bad khlem pynhiar mynsiem ong sa/i/phin sngewthuh ia ka jingshisha ba ki dipthong ki dei ar tylli ki bowel ki ba iasnoh lang bad dei halor kane ka nongrim ba ia ki dipthong la thoh da ar tylli ki dak hajuh kum /ei, ai, ɔɿ, ʊɿ, etc/ Ki dipthong ha ka English ki long phra: /ei, ɔɿ, ai, aʊ, ɔɿ, ɪɔ, ɐɔ/ kum ha ki kyntien **page, home, five, now, joy, near, air, pure**. Ki nuksa ki dipthong ha ka ktien khasi ki long kumne: /ai, ɔɿ, ɪa, ɪə, ɪu, ʊo/ ha ki kyntien **ai, kynoi, diang, jhieh, kyih, lum** (hill).

Mynta ngin peit sa ia ki konsonan. Ban batai ia ki konsonan ka long ka ba donkam ban peit ia ki na ar tylli ki jaka peit. (I) Ka jaka ba u thylliej u ia tyngkhuh bad kawei pat ka bynta jong ka shyntur (place of articulation) bad (ii) ka rukom pynsawa ia ki (manner of articulation).

Na liang ka jaka ia tyngkhuh u thylliej ne kiwei ki bynta ha ka shyntur ban pynmih ia ki konsonan lah ban batai kumne:

Bilabial : Haba baroh ar ki rymmiang shyntur ki ia kynduh lang ban pynmih ia ki jingsawa /p, b, m, w/. kum ha ki kyntien **pan, bang, mana, syrwa**.

Labio dental : Ka rmiang shyntur ka ia tyngkhuh bad ki bniat ki ba nalar kum haba ong /f, v/ ha ki kyntien **five, veil**. Ha ka Khasi ngim don ia kine ki konsonan; hynrei hapdeng ki ba la nang bha ia ka English, kine ki konsonan, teng teng ki mih ha ka jaka byn dei ban mih, kata ki bujli noh ia kiwei ki konsonan Khasi. Kane ka long khamtam eh bad u /f/ u ba teng teng u ieng ha ka jaka u /ph/ kum /ɸɿ/ ha ka jaka /phɿ/.

Dental : Hangne u khmut thylliej bad ki kynriang (sides) jong u ki ia tyngkhuh bad ki bniat jrong (upper teeth) ban pynmih konsonan kum /θ bad ð/ ha ki kyntien English **thin** bad **then**. Ha ka Khasi, ngim don ia kine ki konsonan /θ bad ð/.

- Alveolar** : Hangne pat u khmut thylliej u tied stet ha ka alveolar ridge (khohruh khohram ne trai bniat ha shuwa ka hard palate) ban pynmih ia ki konsonan /t,d,l,n,r,s,z,/ kum ha ki kyntien **tieng, dieng, lieng, neh, rieh, sieh** bad **zoo** ha ka English.
- Post Alveolar** : U khmut thylliej bad ki kynriang jong u ki tied kham shadien ka alveolar ridge ban pynmih ia ki jingsawa/ tr, dr/ kum ka English **rain, train, drain**. Ha ka Khasi **tr** bad **dr** ki long beit alveolar.
- Retroflex** : U khmut jong u thylliej u khun da dien sha ka hard palate bad pynmih ia u jingsawa /ɖ/ kata u /ɖ/ u ba don bad ka jingtyllun kunino re kumba leh ki briew na South India. Ngim don u ba kum une u konsonan ha ka Khasi.
- Palato-alveolar** : Ka lyngnep jong u khmut thylliej ryngkat bad u khmut thylliej hi ki tyngkhuh ha ka alveolar ridge, bad ha kajuh ka por ba kine ki ia tyngkhuh ka pdeng jong u thylliej ka rah sha jrong sha jan ka hard palate ban pynmih jingsawa konsonan kum /ʃ,ʒ,tʃ,dʒ/ kum ha ki kyntien **sha, measure** (English), **chait** (Pnar), **judge** (English), **ja**.
- Palatal** : Hangne ka pdeng thylliej ka rah jan bha sha ka hard palate ban pynmih ia ki konsonan /c,ɟbadj/ jkum ha ka kyntien **ieij, smiej, ñia, knia**. U konsonan/j/u don ha u katto katne ka jingsawa ba kum u i **ha ka khai, iap**, bad **khñiang** lane **ñiah**.
- Velar** : Hangne pat ka dien u thylliej ka rah jan sha ka soft palate ban pynmih ia ki konsonan /k,ɡ,ŋ/ kum ha ki kyntien **kyllon, come, girl** (English) nga. U - g u ba don ha ki dak Khasi um long satia u konsonan Khasi, namar ym don kyntien Khasi ei ei ki ban don ia une. Ka kyntien **gadda** ha ka Khasi ka kylla **kada** (ass).
- Uvular** : Hangne ka dien u thylliej ka rah jan shaphang **ka** bynta ba ha tduh eh jong ka

neng shyntur hajan u pdot ban pynmih ki jingsawa kum u /ʔ/ ha ka kyntien kum **Khasi** lada u ba kren u pynmih ia ka jingsawa /ʔ/ lane **kh** na shaphang pdot.

Glottal : Hangne ka jingsawa konsonan ka mih da ka ba ka lyer na shapoh (kata ha lyndet ki bokal kod ka khynniat ia ki bokal kod bad pynmih jingsawa ki ba kum u /ʔ/ bad h/ ha ki kyntien **pyoh**, **lyoh** bad **hep**, **heh**.

Na ka liang ka rukom pynmih jingsawa konsonan lah ban batai ia kitei kijuh ki konsonan kumne.

Haba ia ka lyer la khang sbak:

- (a) **Plosive**: Kane ka kdew ba hangno re hangno ha ka shyntur kyntihup ia ki bokal kod don ka jingkhang ia ka lyer na ki tor ban mih, hyurei ynda la pyllait ba kan mih, ka mih kysan wia. Ki konsonan /p, b, t, d, k, g, ʔ/ ki dei ki konsonan plosive.
- (b) **Affricate**: Hangne ruh don ka jingkhang lut ia ka lyer, tangba ka don ka jingpyllait ba kham suki ha kata ka rukom ba ka jingsawa jong ki konsonan ka long ryngkat bad ka sur kyrshut (friction). Kane ka paw eh ha ki konsonan /tʃ, dʒ, tɬ, dɬ/
- (k) **Nasal**: Kane ruh ka kdew ba don ka jingkhang sbak ia ka lyer, tangba namar ba ka soft palate ka dem shapoh, ka lyer ka lait ban iaaid lyngba na ka khmut. Ki konsonan /m, n, ŋ, ɲ/ dei ki jingsawa ba na ka khmut.

Haba ia ka lyer la khang de plie de:

Roll: Haba u khmut thylliej u tied stet ha ka alveolar ridge lane ka dien u thylliej ka tied stet ha ka uvula ban pynmih ki konsonan /r/ lane R/ kum haba ong **the idea(r) of** ha ka English, kata haba u /r/ u don hapdeng ar tylli ki bowel. Kane ka long kyrpang ha ka English.

Flap: Haba u khmut thylliej u tied tang shisien ha ka alveolar ridge ban pynmih ia u /r/ kum haba ong **rong**, **red** (English).

Haba ia ka lyer la khang shiteng shiliang

Lateral: Haba ka lyer ka shah khang ha u thylliej u ba ia tyngkhuh bad ka tynrai bniat, hynrei wat haba shah khang kumne, ka lyer ka lait hi na kynriang ka shyntur. U Konsonan /l/ u sawa kum ha kane ka rukom ha ki kyntien lieng, lin, kyllut.

Haba ia ka lyer la pyllait khim:

Fricative: Haba u thylliej bad ki bynta jong u ki rah jan bha ia ki bynta ha ka neng shyntur kumta ba ka lynti iaaid ka lyer na ki tor ka khim bha kat haduh ba haba pynmih ia ki jingsawa konsonan ka don artad ruh bad ka jingsawa kyrshut la kumba niat ia ka lyer. Ka long kumne haba pynmih ia ki konsonan /f, v, θ, ð, s, z, ʃ, ʒ, x, h/.

Semi Vowel: Ki konsonan ki ba haba pynsawa ia ki kim long kum ki konsonan hynrei ki long pynban kum ki bowel, kata yin don jingkah daei daei ruh ia ka lyer ban mih shabar, katba ka kain jong ki pat ka long kum ki konsonan, kata ki sdang ne pynkut ia ka kynnoh la khot ki semi vowel ne bowel shiteng. U/w/ bad /j/ lane i ki dei ki semi vowel.

Ha ka Lynnong - 1, la kdew ba ka morpholoji ka long kawei na ki kyrdan jingpule ha ka lingkwistik bad ba ka long ka jingpule shaphang kumno ia ki kynnoh bad kyntien la pynlong. Don ki stad lingkwistik ki ba khein ba ka morpholoji ka dei ka bynta jong ka Syntak. Lah ban leh kumta lada ngi peit ia kane na ka liang ka jingidei jong ki kyntien bad ki sentens ki ba ki pynlong. Hynrei na ka bynta ka jingsngewthuh jong ki nongpule ki ba dang shu sdang, yn buh ia ka morpholoji ha ka jaka ka ba kyrpang na ka syntak.

Ka morpoloji kum ka jingpule shaphang ki kyntien ka peit ia ki na ka liang ka dur (form) bad kumno ki jingkylla ha ka dur ki wanrah ia ki jingkylla ha ka jingmut, e.g., ka kyntien English **child**, ka kdew ia uwei/kawei u/ka khynnah, hynrei ynda la pyndap sha ka sa da **-ren**, ka kyntien **child** ka kylla **children**. Kane ka jingpyndap ka pynkylla dur ia ka kyntien **child** na ka shi kynnoh sha ka ar kynnoh. Ka jingmut ruh ka kylla na u/kawei u/ka khynnah sha **ki khynnah**. Ki nuksa na ka ktien Khasi ki long **lada** bad **nga**.

Ka kyntien **lada** ka kdew ia ka jingdon lad sa shawei (alternative), e.g., **Lada phi kwah, shim!** Hangne, ka jingmut ka long ba **lada ym kwah te ynnai shim**. Ka **lada** ka long ka kyntien ka bym khang lad ia u ba sngap ban jied ia ka ba u mon. Kane ka **lada** ka lah ban kylla ha ka dur bad ha ka jingmut ruh lada hapteng jong ka la bsuh da u **-m** kumta ba ka **lada** ka kylla **lamda** lanc **lymda**. Don ki Khasi ki ba ong **lamda**, don pat ki ba ong **lymda**. Ka jingmut jong baroh ar ka long kumjuh. Ka jingapher ka long tang ha u bowel. Ha ka **lamda** u bowel u long u dei u /a/ hynrei ha ka **lymda**, u bowel u long u /i/ bad ha ki jingthoh Khasi la thoh ia u da u **y**. Haba ka **lada** ka kylla **lamda/lymda**, ka jingkynnoh ka la pher bad ka jingmut ka kylla na ka jingbymkhang lad sha ka ba khang lad. e.g., **Lymda phi minot phin pheil**. Hangne ngi iohi ba ka jingminot ka dei tang ma ka hi ka lad ban lait na ka ba pheil, kata lait na ka minot, ym don lad shuh da kumwei. Lada ngi shim biang la u **-m** bad pynsnoh ia u ha ka kyntien **nga**; kumta pynkylla

ia ka **nga** sha ka **ngam**, ngin iohi ba hangne ruh don ka jingkylla ym tang ha ka dur hynrei ha ka jingmut ruh. U **-m** haba u iasnoh bad kano kano ka personal pronoun **ngam**, **ngim**, **pham** etc. u kdew ia ka rai ba kata ka personal pronoun ka ai halor ka verb ka ba bud ia ka. e.g.,

Ngam		
Pham		
		leit
Mem		
Kim		

Ngin iohi lyngba kine ki nuksa ba u **-m** u kdew ia kata ka ba ngi ong ka **Negation** lane ka jingkynem ia kaei kaba ka verb ka ong.

Ngin iohi ruh ba u **-m** u mak ia ka negation ha ka kyntien **lymne**. Ka kyntien ka ba ia pyrshah bad ka **lymne** ka long **lane**. Kane ka kyntien ka kdew beit ia ka jingjied hapdeng kiei kiei ki ba ia ryngkat bad bym ia ryngkat ruh, e.g., **Ka sylar lane ka pylleng**. Ka kyntien **lymne** pat ka kdew ba ka jingjied ka iaaid ryngkat bad ka **negative** ha ka verb. e.g., **Ka sylar lymne ka jingai ei ei ruh ngam don**. Kane ka **lymne** ka ia dei kumjuh bad ka kyntien **nor** ha ka English.

Na ka liang ka morpholoji ngi lah ban ong ba u **-m** u dei u ba kdew ia ka negation, bad kum u **marker of negation** ngin shem ia u ha ka kyntien **khlem** bad **shym** ruh. Kine baroh ar ki dei **Pre Verbal Negative Marker** (Ki kyntien ba kdew ia ka negative bad ki ba ieng ha shuwa ka verb), e.g., **Um shym leit/u khlem leit**.

Ia ka kyrdan jingpule morpholoji lah ban bynta ha ki ar bynta: (1) **Ka Inphlekshonal (Inflectional) Morpholoji**, bad (2) **Ka Deribeshonal (Derivational) Morpholoji**. Ka ba nyngkong ka peit ia ka jingkylla ha ki kyntien da ka ba bsuh dak (ne bsuh bowel/konsonan) hapdeng ne hadien ha ka kyntien. Ha ka Khasi ym da don bun ki nuksa ia kum kine ki jingkylla. Lait noh ka **lymda**, **lymne** sa tang **ka - ki**, **pha- phi** ki long kiwei pat ki nuksa jong ka Inphlekshonal Morpholoji. Ka deribeshonal morpholoji ka long ka rukom jingpynheh ne jingpynkylla ia ki kyntien da ka buh kynnoh shuh shuh na shuwa, hapdeng ne nadien, e.g., buh **jing-** na khmat ka verb e.g., **khang** ban ioh ia ka kyntien **jingkhang**. Hapdeng **jingkhang** lah ban bsuh sa da kawei ka kynnoh **-pyn-** kumta ba **jingkhang** ka kylla **jingpynkhang**. Ka ktien

Khasi ka pyndonkam bha ïa kane ka buit pynneh kyntien. ïa ki kyntien kum **jingpynkhang** la khot ki **Compound Word**. Ka jingthaw ne jingpynneh kyntien ha ka Khasi ka long beit na ka liang kadiang, kata na shuwa ka kyntien ïa ka ba yn pynneh. Ha kiwei kiwei pat ki ktien, ka jingpynneh ka lah ban long nadien ruh, e.g., **propose** kylla **proposition** da ka ba buh **-ition** nadien **propose**. Ha ki kot Kramar la tip ïa kane ka jingpynneh da ka kyrteng **Affixes** ka ba kynthup ïa ki **prefix (jing, pyn)**; **infix** kum **-m** ha **lymda**; bad **suffix** kum **-ation** ha **accusation**. Ki American Structuralist, kata ki stad lingkwistik na America ba la tip da ka kyrteng **structuralist**, ki ong ba ka jingpynneh kyntien da ka ba pyndap ne bsuh dak ne kyntien ka dei ka **Morphimiks** (Morphemics). Ki ong ba lada ka jingpule ka long khamtam ban lap kumno kine ki jingpynneh kyntien ki trei kam ha kawei ka por, ïa kata ka jingpule yn khot **Morphimiks**, hynrei lada peit ïa ka histori jong ki jingkylla baroh ïa kata yn khot ka **morpholojik al analisis** (morphological analysis).

Ka ba donkam eh ban sugewthuh ha ka jingpule morpholoji ka long ka jingmut jong ka kyntien **morpheme**. Kine ki morpheme ki dei ki bynta kj ba rit duh ha ka Kramar, kata, ki long ki bynta ïa ki ba ym lah phiah shuh. Kine ki kyntien harum ki ba don ha ka liang kadiang lah ban ong ba ki kynthup ïa ki morpheme ki ba pher kat kum ba ki paw ha ka liang kamon.

boys	=	boy	+	-s
loved	=	lov+(e)	+	-ed
ngam	=	nga	+	-m
jingkhang	=	jing-	+	khang
pyndeng	=	pyn-	+	deng

Na kine ki nuksa lah ban ïohi shai kdar ba ki **morpheme** ki lah ban long: (i) tang kawei ka sur sawa, bad (ii) ki kynnoh, (iii) ki kyntien. Na kitei ki **morpheme** ba la phiah kine: **boy**, **love**, **nga**, **khang** bad **deng** ki lah ban ïeng tang ma ki hi ha ki sentens ba pher ba pher. ïa ki ba kum kine la khot ki **Free morpheme**. Hynrei **-s**, **-ed**, **-m**, **jing-** bad **pyn-** kim lah satia ban ïeng tang ma ki hi. Kine ki don jingmut tang haba ki iasnoh bad ki **Free Morpheme** kum ha kitei ki nuksa. ïa kine ki ba shu snoh ha kiwei la khot ki **Bound Morpheme**.

Ha ka jingpule ia ki **morpheme** ka long ka ba donkam ban sngewthuh ba ki **morpheme** kim don sah tang kawei ka jingmut. Shisha, ka jingmut jong ki ka shong eh kat kum ka jingpyndonkam ia ki. Don pat ki **morpheme** ki ba i kumjuh kumjuh na ka liang ka kynnoh bad lehse ka spel dak ruh, hynrei ki ba ka jingmut jong ki ka ia pher bak lbak kawei na kawei.

Mynta ngln peit ia ka **jing-**. La shim kyllum ba ka kynnoh **jing-** ka pynkylla ia ka kyntien na ka **verb** sha ka **abstract noun**, e.g., **jingsuk**, **jingbha**. Lada peit blia kane ka kynnoh ka pynkylla ruh ia ka verb sha ka noun (instrumental bad ka thew ia ki tiar da ki ba ngi leh ei ei e.g. **jingtap**: ka tiar da ka ba ngi tap. Hynrei kane kajuh ka jingiasnoh ki **morpheme jing-** bad **tap**, ka lah ruh ban kdew ia ka abstract noun lada ka jingpyndonkam ia ka ka long kum ha kane ka sentens: **Ka jingtap pat ruh kaba la i torti sat**. Hangne **jingtap** kam kdew ia ka tiar hynrei ia ka jingleh namarkata **jingtap** ka dei ka abstract noun.

Ka kyntien **-pyn-** ruh ka don ar jingmut. Ka ba nyngkong ka kdew ia ka ba uwei (mano-re-mano) u leh ei ei na ka bynta kiwei pat e.g., **pynleh** ha ka sentens: **Sngewbha pynleh lem seh ia kane**. **Pynthoh**, **pynteh**, **pynthied** ki long kiwei pat ki nuksa.

Kawei pat ka jingmut jong ka **morpheme pyn-** ka long uwei (mano-re-mano) u long ka daw na ka bynta ka jingleh (kat kum ka verb) e.g., **pynhoit** ha ka sentens: **U pynhoit ia ka dud**. Kane ka sentens ka kdew ba ka dud kam shym hoit hi hynrei ba don uwei u ba pynlong ia ka dud ban hoit lane u ba long ka daw jong ka jinghoit. Kiwei pat ki nuksa ki ba kdew ia kane kajuh ka jingmut jong ka **pyn-** ki long **pyndait**, **pynshit**, **pynkhiah**, **pynbiang**.

Kane ka pynkynmaw ia ngi sa ia kiwei pat ki kyntien ki ba don bad ka kynnoh **pyn-** ha khnat : **pynban**, **pynshoi**, **pyntha**, **pynthame**. Kine ki kyntien kim imat ba ka kynnoh **pyn-** ka dei ka **bound morpheme** namar ki kynnoh ki ba bud ruh kim long ki ba ngi lah ban ong ba ki dei ki **free morpheme** ne **bound morpheme**. Kine kim don jingmut ei ei ha ki hi. Namarkata, ka jingpynkut nia ka long ba kitei ki kyntien haneng ki long ha la ka jong ka jong ki kyntien bad namarkata, ki dei ki **morpheme** ki ba don haduh ar bad lai kynnoh.

Kawei pat ka ba dei ban iohi, kumba la kdew sha khmat ka long ba ki **morpheme** ki lah ban i kumba ki dei kijuh, hynrei ha ka jingshisha pat ki long ki ba ia pher. Ia ki ba kum kine ki ong ki **Homonym**. Don bun ki nuksa ia ki **homonym** ha ka ktien Khasi. Ka **morpheme la** kum ka **past tense marker** ka don kine ki **homonym** harum:

la - possessive marker : Shim **la** ki jong ki jong ki kot.


la - conditional marker : Ngim tip **la** un wan ne em.

la - insistence marker : Ngan mih **la** ka mih.

Kine ki **la** ki pher na ka **la-** ka ba long ka bynta jong ka **lajong**, bad ka **-la** ka dei ka bynta jong ka **manla** bad **mamla**, **pela**, **tala**. Ha kine, ka **la** kam dei ka **morpheme** kyrpang hynrei ka bynta jong kine hi ki kyntien ki ba baroh kawei ki long ki **free morpheme**.


Na ka ba la kdew, ka shai ba ka jingbatai ka ba ia dei bad ka kyntien **morpheme** ka long ba ka morpheme (lane **morph**, don ki ba ong tang **morph**) ka dei ka bynta ka ba rit duh ha ka Kramar, bad ka dei ruh ban long ka bynta ka ba don bad ka jingmut. Ka **morpheme** ka lah ban long ka kyntien lane ka kynnoh lane kawei ka jingsawa bowel ne konsonan.

Ka bynta ka ba lai jong ka lingkwistik ka dei ka syntak ne ka Kramar. Ia kane yn ym kren ei ei ha kane ka kot namar ba lada dei ban thoh ia kane, donkam tang halor kane hi kawei ka kitab.



1. Ha shuwa ba ngin kdew ia ki **tense marker** ha ka Khasi, ngin peit nyngkong ia ka jingmut jong kane ka kyntien. Ngin pyrshang ban batai ia ka na ka liang ka ba kam long. Bunsien eh la ju sngewthuh bakla ia kane ka kyntien kum ka por ha ka jingmut jong ka kyntien **time**. Ha ka jingmut jong ka kyntien **time** lajan baroh ki jaidbynriew ha ka pyrthei ki iohi ba ka por ka tuid kum ka wah na kawei ka tduh (dong) sha kawei pat. Ngin ym ia kren ia ka jingsdang jong ka por hangne. Kane ka long ka bynta jong ka Philosophi - ka jingpyrkhat ia ka ba ym shym la lah ban ai ka rai kut naduh mynno ka por ka sdang. Kumba ka long la shum ia ka jingkha ia u Khrist kum ka jingjia na ka ba la kheih ia ka por. Kumta ha ki jingpule ba pher ba pher la kdew ia ar tylli ki por: B.C. (Before Christ: ha shuwa u Khrist) bad A.D. (In the year of the Lord: Naduh ba la kha ia u Khrist). Hapdeng jong ngi ki Khasi. **U Jumai Bah 1897** u la long ka por na u ba la kheih ia ka rta jong ki ba bun ki tymmen, bad ka rta jong kiei kiei ki ba rin kum ki iing, ki kor, ki jingjia ba pher ba pher hapoh ka ri. Khlem da kren ia ka jingsdang jong ka por, lah ban kren kyllum ba ka por ka don lai bynta: Ka Mynnor, ka Mynta bad ka Lashai.

Lada ngi shim ia ka Mynta kum ka jaka peit (viewing position) ia ka jingaid jong ka por ngi lah ban sngewthuh ba ka Mynnor ka long ha shuwa ka Mynta bad ka Lashai hadien ka Mynta. Lada dro ha u lain u ba beit ka Mynnor kan hap sha kadiang na ka Mynta bad ka ban sa wan (Lashai) kan hap ha ka liang kamon kumne harum. Ka Mynta ka long hamar pdeng u lain bad ngin mak ia ka O.



Lah ban woh dong ia une u lain ba um da shai bha lane ba ym lah ban ong ba ka por ka iaid shisha kumne. Ym lah shisha ban ong ba ka por ka iaid ha u lain u ba shu sah hajuh (stationary) lane ba ka por ka iaid lyngba une u lain. Hynrei nga shu ngeit ba une u lain la um da bit da


biang nadong shadong. pynban u ia jan bad ka jingsngew-
thuh ki ba bun shaphiang ka por.

Kat kum utei u laiñ, ngi iohi ba ka Mynta ka ioh tang
khyndiat bha i jaka. Lada shim ba ka Mynta ka dei ka por
kren, ngi lah ban ong ba ka Mynta ka dei thik tang ito i
khyllipmat ba ang ia ka shyntur ban ong, lehse, ia kawei ka
kyntien ha ka sentens. Ha kane ka rukoin lada ka sentens
ka long ka ba jrong shiphew kyntien, ka Mynta jong ka
kyntien ka ba nyngkong jin kat ban da dep ka kyntien ka
ba shiphew ka lah da kylla long ka bynta jong ka Mynnor.
Kane kan long kumta shi kumta ha man la ka kam, ha man
la ka jingkren. Ha ka jingim ka ba man la ka sngi kam long
kumta. Baroh ngi tip ba ka Mynta kam long tang shi
khyllipmat hynrei kham bun ban ia kata. Ka Mynta ka lah
ban kynthup ia ka khyllipmat ka ba mynta ryngkat bad
katto katne ka Mynnor, Namarkata, ngin batai ia **ka Mynta
ba ka long ka Mynnor + Khyllipmat ba kren ne ong ia
kata ka jingong**. Ha ka jingong: **Ka bam ka dih ka rem
bha ha kine ki sngi mynta**. Ka jingkdew ka long kumne:
Kat kum ka jingshem u nongkren ka bam ka dih ka la rem
la katto katne por (Mynnor) bad haduh ha ka por ba ong ia
kane ka jingong ruh ka jingrem ka dang neh. Ka kyntien
Mynta ha kane ka sentens ka long na ka ka ba kdew ia ka
por (reference time) na ka ba la peit ia kane ka jingrem ka
bam ka dih.


Ha u laiñ ba la dro haneng ngi iohi ba don lai tylli ki
por (reference time): Mynnor, Mynta bad Lashai. Kane ka
jingbynta 'kham bun sien' hi ka long ka ba biang. Ngì ong
'kham bun sien' namar na ki lai bynta jong ka por ba la
pynbynta haneng dang lah ban pyniabynta shuh. Ka Mynnor
ka lah ban long ka ba la slein bah (hyndai), ka lah ban
long ka hym pat da slein eh (mynnynmwei/mynnynmar), lane
ka lah ban long ka ba dang shi sngi shuwa ka mynta
(mynhynnin), lane ka ba kham jan ia ka mynta kum
(mynhynne). Nangta ka Mynta ka lah ban kynthup ia ka
por ka ba tang shi khyllipmat, shi kynta, shi sngi, shi hat,
shi taiew, shi snem etc. Ka lashai ka lah ban kdew ia ka
ba jan eh ia ka mynta (shibit), lane jngai arphewsaw kynta
na ka mynta (lashai), lane jngai shi snem (la nymwei) bad
kumta ter ter.

Ha ka jingpyndep ia ki kam ki ba bun ha **ka jingim ngi
shem ba kawci ka kam ka shuwa ia kawci pat**. Ha kiwei pat
ki kyntien lah ban ong ba kawci ka kam ka bud ia kawci

pat. Hynrei ka long ruhi ka ba shisha ba ki kam ki ia (ban (overlap) kawei ha kawei pat. Kane ka mut ba ki jingjia ne ki kam ha ka jingim kim long kim jia tang ha iwei i por. Ka lah ban long ba kawei ka jingjia ka jia ha ka por ba kawei pat ka jingjia ruhi ka jia. Kane harum ka long ka jingpyrshang ban pyni kunino ki jingjia ki jia kawei hadien kawei pat ne ki ia tban kawei bad kawei pat. U laiñ u ieng na ka bynta ka por (time line), ki dak A,B, K,etc. bad ki synduk na ka bynta ki jingjia.



Hangne ngi iohi ba ki jingjia A bad B ki jia ha la ka por ka por, bad ba ka jingjia A ka shuwa ia ka jingjia B. Ki jingjia K bad D ki jia hadien ka jingjia B lane hadien baroh ar ki jingjia A bad B. Ki jingjia K bad D ki jia ryngkat naduh ba ki sdang haduh ba ki kut. Nangta bud sa ka jingjia E bad G. Kat kum ka jingbuh hangter ngi iohi ba ka G kam pat sdang haba ka E ka la sdang, tangba ynda haba ki kut. ki kut hamar ka juh ka por. Ha ka jingjaid ka por, lah ban ong ba ki jingjia A, B, K bad D ki shuwa ia baroh ar ki jingjia E bad G. Lada ngi iaial shuh shuh ngin iohi ba ka jingjia NG ka kynthup shibun ka por bad ba hapoh jong ka ka kynthup ruh ia kawei pat ka jingjia H. Ka jingjia NG ka la sdang slein shuwa ba ka jingjia H kan sdang, hynrei ha ba ka H ka la kut, ka NG kam pat kut satia. Ka jingiatban jong ki jingjia I bad I ka long mar shiteng. Haba ka jingjia I ka la sdang bad la poi mar shiteng ka jingjia I ka sdang; bad haba ka I ka la kut ka I ka dang long dang mar shiteng, Mynta lada dro thynmai ia u laiñ por da ka ba mak (O) ia ka Mynta ngin iohi ba un long u laiñ ha u ba ki jingkdew ki la kham thikna na ka liang ki lai por (reference time) kata, Mynnor, Mynta bad Lashai.



Kane ka dur ka kdew ba ki jingjia A, B, K, D, E bad G ki jia ha ka Mynnor; H, I bad I ha ka Lashai kata hadien ka Mynta. katba ka jingjia NG pat ka dang jia ha ka Mynta.

Baroh ka ba la kdew shaneng ka long ka jingpyrshang ban kdew ia ki jingjia ha ka jingjidei jong ki kawei bad kawei pat bad ruh ka jingjidei jong ki bad ka por. Ban kdew ia ki jingjia bad ka por ha kaba ki jia, ngi dei ban peit ia ki na ki ar tylli ki mat. (i) Ki kyntien ki ba kdew ia ka por, kata kito ki ba pynthikna hamar kano ka por ka jingjia ka jia, bad (ii) Ki kyntien ne kynnoh ha ka Kramar jong ka ktien ki ban long ki jingkdew ia ka por jong ki jingjia.

Shuwa ba ngin iaid shaphrang ngi dei ban sngewthuh ba halor jong kitei ki mat haneng ki ktien jong ka pyrthei ki pher kawei na kawei. Na ka liang ki kyntien ki ba kdew thikna ia ka por, ym da don eh ki jingeh, namar lada ka ktien kam don ia ki ba kum kita ki kyntien ka lah ban shim kylliang na kiwei pat ki ktien. Ka la long kumta ha ka ktien Khasi. Ki kyntien thew por ba thikna kum **sekhon, minit** bad **kynta** ki long ki ba ngi la shim kylliang na ka English bad Hindi. Katha nang iaid ka por, ka lah ban long ba ngin nang shim kylliang shuh shuh ha kane ka liang. Hynrei ka ba ngi kwah ban ia kren mynta ka long shaphang ki kyntien bad rukom kdew por ba la don lypa ha ka ktien. Na kane ka liang ka donkam ia ngi ban phiah ia kita ki kyntien ha ki lai kyrdan. (i) Ki thup kyntien kdew por ia ki ba la pynlong da ka ba buh lang ia katto katne tylli ki kyntien ha kata ka rukom ba ki kdew thukna bha ia ka por ba ki jingjia ki jia (lexically composite expressions), e.g., **san minit hadien, saw sngi shuwa, hadien kata**, etc. Kane ka thup ka long ka ba heh tam, namar ka shong ha ka jingstad ki nongkreu ban thaw kum ia kitei ki thup kyntien kdew por, (ii) Ka kyrdan ka ba ar ka dei kito ki kyntien ki ba long tang kawei hi ka kyntien, bad ki ba biang na lade ban pyndep ia ka kam (function) kdew por khlem da shantiah ha ka jingjabyrap jong kiwei pat ki kyntien. Kine ki kyntien ki dei kito ia ki ba ha ka Kramar ngi khot ki Adverb of Time e.g., **mynhynnin, laesai, lashibit, lashisngi** etc. (iii) Ka kyrdan ka ba lai ka long kito ki kyntien ne kynnoh ki ba kdew ia ka por ha ka sentens bad ha ki ba ka jingbeit jingbiang jong ka sentens ka shong. Ia kine la tip kum ki **grammatical item**. Kine nalar ba ki mak ia ka por ha ka sentens ki mak ruh ia ka jingbeit (grammaticality) jong ka sentens baroh kawei Ki nuksa ki ba shai eh ha kane ka liang ki long u-s bad -ed ki ba bud nadien ka verb ha ka English. Kine ki sentens harum ki long ki bym beit na ka daw ka jingbymdon u -s, -ed.

1. * He walk home alone

2. * Yesterday he walk home alone.

Lada ngi buh **-s** ha ka ba nyngkong bad **-ed** ha ka ba ar, ki sentens kin long ki ba lah ban pdiang kum ki ba beit (grammatical) kumne:

1. a. He walks home alone.
2. a. Yesterday he walked home alone.

Ila ka English **-s** bad **-ed** ki dei kita ia ki ba la tip kum ki tense marker, bad ka jingpule ia ka Tense ka long kyrpang ia ki tense marker ki ba kum kine lane ki ba long hi kawei ka kyntien ne kynnoh kat kum ka rukoni jong ka ba ia pule. Hynrei shuwa ha ngin peit ia ki tense marker, kan iarap ia ngi lada ngi batai nyngkong ia ka jingmut jong ka kyntien Tense.

2. Ngi la pyrshang ban batai ia ka tense na ka liang ka ba kam long. Mynta ngin peit ia ka na ka liang ka ba ka long. Ka Tense ka long ka jingpule ia kito ki kyntien ne kynnoh ki ba hap na ka kyrdan (iii) haneng ki ba ka kam jong ki ka long ban kdew ia ka por ha ka sentens. Nalor kane, ki pynbeit ruh ia ka sentens kat kum ki aifn Kramar jong kata ka ktien. Ka Tense ka dei ruh ka bynta jingpule ka ba donkam ba ka jingkheln por (reference time) kan long na ka mynta (present moment) jong u nongkren. Kawei pa kawei ka jingong (language utterance), ngi dei ban sngewthuh, ka jia ha kano re ka jaka ka ba thikna (particular place) bad ha ka por ruhi ka ba thikna (particular time). Ban don ka jingong donkam ruh ia u nongong bad ia u nongsngap. (Kane kam thew ia kito ki jingong ha ki ba u nongong bad u nongsngap u dei u juh). Haba ka long kumne ngi lah ban iohi ba ka jingkheln por ka kylla katba kum u nongkren. e.g., Lada ha ka jingiakren hapdeng u Mon bad u Don, lada u Mon u kren ka jingkheln por ka long na ka por ba kren u Mon. Hynrei lada u Don pat u kren ka jingkheln por kan long na u Don. Ka jingkylla ka ba kum kane ka long kata ia ka ba la khot ka **deictic centre** lane phang kdew ka ba kylla kat kum u nongkren. Kane ka jingkylla kam ktah tang ia ka Tense hynrei ia ki Person (First, Second, Third) bad ia ka jaka ruh. Ngi ia tip baroh shaphang ki First Person, Second Person bad Third Person ha ka Kramar. Ka First Person ka thew ia u briew u ba kren. Une haba u kdew ia lade u pyndonkam da ka First Person Pronoun - **nga**. **Nga** ka dei ka phang kdew, bad na kane ka phang kdew u ba sngap u dei ka Second Person. **Me/pha/phi**, bad kiwei pat, kata, ki briew,

mradi, maw, dieng etc. ki dei ka Third Person. Kumta ha ka jingiakren u Mon bad u Don, u Mon u dei ka First Person lada u kren ma u, bad u Don u dei ka Second Person, hynrei lada kren u Don, u Don u dei noh ka First Person bad u Mon pat ka Second Person. Na ka liang ka jaka ruh ka don ka jingkylla, e.g., Ka 'hangne' lane ka 'hangto' ka kylla kat kum u nongkren. Kane ka mut ba lada u nongkren u ong 'hangne' ka jingmut jong ka, ka long ha ka ba don u nongkren; bad lada u ong 'hangto' ka thew ia ka jaka ka ba jngai na u nongkren, hynrei ka ba jan ia u ba sngap. Kane ruh ka kylla mar khongpong lada u ba sngap u kylla long noh u nongkren, bad u nongkren u ba mynshuwa u nongsngap. Ka jingpule shaphang ki Adverb of Place bad Time, Person bad Tense ki long ki ba lah ban kham sngewthuh ynda haba la peit ruh ia ka phang kdew ne deictic centre.

2.1 Nalor kine ba la kdew haneng, ka Tense lah ruh ban ong ba ka long ruh ka bynta jong ka Verb namar kham bun sien ka verb ka dei ka ba shah ia ka kylla ynda haba la pyndap ia ki Tense Marker. Kum ka nuksa, ka kyntien **love** ha ka English ka long ka bym pat shym la mak da ki tense marker. Hynrei ynda haba la mak ia ka tense katei ka kyntien ka kylla **loves** (Present tense) bad **loved** (Past tense). Kane ka nuksa ka long ka ba ia dei eh bad ka English. Te kumta ka jingkylli ka ba mih ka long: Kumno shaphang kiwei pat ki ktien, kum ka Khasi, ki bym mak ia ka tense kumba la mak ha ka English? Lada ym mak ia ka tense ha ka Verb kum ha ka English dang lah hi ban ong ba ka tense ka dei ka bynta jong ka verb? Ban jubab ia kine ki jingkylli, nyngkong ka dei ia ngi ban sngewthuh katto katne shaphang ka jingfapher hapdeng ka ktien English bad Khasi.

2.2 Ka English ka dei ka **inflexional language**, kata ka ktien ka ba mak ia ki jingkylla ba pher ba pher jong ki kyntien kat kum ka jingdonkam da ki **inflexion**. Ki inflexion ki dei ki jingpyinkylla hapoh ka kyntien da ka ba ki bowel ne konsonan ki kylla e.g., foot/feet; leaf/leaves, ne da ka ba pyndap dak shuh shuh e.g., boy/boys, I/me/mine etc. Ka Khasi kam dei ka **inflexional language** hynrei ka **prepositive language**. Kane ka mut ba ka Khasi ka dei ka ktien ka ba kdew ia ki jingkylla ba donkam da ka ba buh da kiwei pat ki kyntien na khmat ka kyntien ba donkam ban pynkylla, e.g., Lada kwah ban pynkylla ia ka masculine noun u **briew** sha ka feminine noun ka jingkylla ka wan ym ha ka kyntien

briew hynrei da ka ba kylla ia ka kyntien ka ba na khmat jong ka kumta ba **u** ka kylla noh **ka**. Lada kwah ban pynkylla na ka singular sha ka plural ruh ka jingkylla kam long ha ka kyntien ka ba dei ka noun hynrei ha ki kyntien na khmat jong ka kumne: **u/ka/i khynnah** kylla **ki khynnah**. Haba peit ia kane na ka tense, ngi iohi ba ka ktien Khasi ka kdew ia ka da ka ba buh ia ki tense marker **la** bad **yn/n** na khmat ka verb e.g., **la leit**, **yn leit**. Bad namar ba ki tense marker ki don jan bha ia ka verb, wat la ka jingkylla kam long ha ka verb. lah ban ong ba ka tense ha ka Khasi ruh ka dei ka bynta jong ka verb. Hynrei lada bishar bha khamtam lada pynshong nia halor ka jingshisha ba ka tense ka ktah ym tang ia ka verb marwei hynrei ia baroh kawei ka sentence ngi lah ban ong ba ka tense kam dei ka bynta jong ka verb marwei hynrei jong baroh kawei ka sentens. e.g., Ha ka jingong: **Ka Rin ka la leit shisha ia u Bin** ka jingkdew kam long tang ba ka jingieit ka la sdang shuwa ia kane ka por kren hynrei ruh ia ka jingshisha ba ka jingieit ka la long ka ba shisha; ba ka nongieit ka dei ka Rin bad u nongshah ieit pat u dei u Bin. Lah ruh ban ong ba ka jingpyrkhat ba ka tense ka dei ka bynta jong ka verb kam lah ieng namar ba ka future tense marker **yn/n** ha ka Khasi nalar ba ka ieng hajan ka verb ka lah ruh ban snoh ha ki personal pronoun. e.g., **ngan leit/un leit** etc.; ka lah ruh ban snoh ha ka **ba** kumne: ba + n = **ban**. Kane ka jingong **ngan leit** pat kum ha katei ka jingong haneng ka long ka jingong ka bym ktah tang ia ka pronoun (namar ba u **-n** u snoh ha ka **nga**) hynrei ka ktah lang ia ka verb ba ka jingleit kan long hadien ba la kren. bad ba u ban leit u dei **nga**, kata u nongkren. Lah ban batai ba ka jingdon jong u-**n** ha ka kyntien **ban** kum ha ka jingong: **Nga kwah ban wan sha phi** ruh ka ktah ia ka sentens baroh kawei ym eh tang ia ka kyntien **ban + verb**. Namarkata, ka kham bha ban ong ba ka tense ka dei ka bynta jong ka sentens baroh kawei ban ia ka ba ong ba ka dei ka bynta jong tang kawei ka kyntien ha ka sentens.

Na ka ba la kdew sha khmat kawei ka bynta ka ba donkam bad ka ba ngim dei ban klet ka long ba ia ka tense lah ban pyni da ki inflexion ne da ki **grammatical item** kumba ka long ha ka Khasi.

2.3. Ha ka Khasi, don ar tylli ki tense marker **la** bad **yn/n**. Ia kine lah ban pyndonkam ha kine ki rukom harum. Nongkong eh ngin shim ia ka **la**.

2.3.1. La ka dei ka past tense marker. Ka jingmut ba kongsan eh jong ka haba ka don ha shuwa ka verb e.g., **la dep**, ka long ban kdew ba ka kam ne jingjia ka la sdang ha shuwa ka por ba kren. Ha ka ktien Khasi don kiwei pat ki **la** ki bym dei ki past tense marker.

e.g., (3) **La** phi kwah ne phim kwah leit, phi dei ban leit.

(4) Shim **la** ki tiar lajong.

Ha ka (3) ka jingpyndonkam ia ka **la** ka long **conditional** kum ka **if** ha ka English; ha ka (4) ka jingpyndonkam ka long **possessive**. Ka **la** ka ba dei ka tense marker ka don borabor ha shuwa ka verb lane ka lah ban kynriah katto katne shaphang kadiang na ka verb lada hapdeng jong **la** ... **verb** la bsuh da ki kyntien kum **lah, ial, pyn, shu, nang, ia, ju, shait, hap, dei, dem**, e.g., **la lah suh, la pynsuh, la nang suh** etc.

Hynrei ka **la** kum ka Past Tense marker ka don ka jinglong kyrpang jong ka bad kata ka jingkyrpang ka long ba ia ka **la** lah ruh ban nym da pyndonkam ha ka sentence wat lada dei ba ki jingjia ki jia ha ka Mynnor. Kane ka jingshah iehnoh (optionality) jong ka **la** ka long khamtani eh lada la pyndonkam na ki Past Time Adverb/Adverbial e.g., **Mynhyndai, shisien ha kawei ka por, myn ha kita ki por** etc. Ka jingshah iehnoh jong ka **la** ka long ruh namar ba ia ka jingkdew ba ki jingjia ki jia ha ka Mynnor lah ban sngewthuh na ki jingjakren (context). Kawei pat ka rukom shah iehnoh ka **la** ka long ba kawei ka **la** ka ba don ha ka sentens ba sha khmat ka lah ban siewspah ia kiwei pat ki sentens bym don **la**, e.g.,

Ka Rin ka **la** leit sha u Bin ban kyrpad ia u ba un iarap pisa ia ka. Ynda ka (la) poi ha iing jong u, ka (la) shem pynban ba u Bin u pang.

Ka **la** ha shuwa **leit** ka biang ban nym da pyndonkam shuh ia ka ha ki sentens ki ba hadien. Dei namarkata, la buh ia kito kiwei pat ki **la** ha braket.

Kam kut tang katne shaphang ka **la**. Ka jingpyndonkam ia ka kam long tang ia kaba la jia shisha (actual) hynrei ruh ia ki jingjia bym pat ji (non-actual situation). Kawei na kiba kum kine ki rukom pyndonkam ka long kum ha kane ka jingjia harum:

(5) Rang: Ei Phang ale noh!

(6) Phang: To nga **la** wan.

Lah ban woh dong ia kane ka **la** ba kam kdew ia ka mynnor. Namar haba u Phang u ong: **to nga la wan**, ka jingshisha hi ka long ba um pat wan. Te hynrei na ka liang ka jingmut jong ka jingong lah ban ong ba ka **la** hangne ka don ia ka jingmut jong ka past tense namar ka jingong **to nga la wan** ka mut ruh ba la u Phang um pat wan pynban u **la sngewthuh** ba u dei ban wan noh.

Sa kawei pat ka jingpyndonkam ia ka **la** ka ba syriem eh ia katei haneng ka long ha ka por ba dang bam/dih haba u nongkren u kwah ban iaroh ba kata ka jingbam/ jingdih ka long ka ba bang. e.g., **Ka ba la bang kata ka sha**. Ila kane ka por, u nongkren um pat dep dih, u dang shu mad ia ka. Hynrei ka jingpyndonkam ia ka **la** hangne ka long ban kdew ba u nongkren na ka ba u la mad, u la sngewthuh ba kata ka sha ka bang kat haduh ba um lah khlem da kubur kumta. Ka ba kum kane ka rukom pyndonkam ia ka past tense ha ka ba kum kane ka jingjia ka don ruh ha ka German e.g., **dies schmeckte gut** (*this tasted good: ka ba la bang). Ki Norwegian ruh ki pyndonkam ia ka past tense ha kane ka rukom e.g., **detta smakte godt** (*this tasted good: ka ba la bang). Nga mak* ia ka transleshon ***this tasted good** namar ha ka English ka dei ban long **this tastes good**.

Kaba kdew ia kine ki rukom pyndonkam ia ka past tense da kiwei pat ki ktien ban kdew ia ka bym pat jia/dep ka long na ka bynta ban pyni ba kane ka rukoni kam long ka ba leh tang ha ka Khasi. Ka long ruh na ka bynta ban kdew ba ka **la la** ka jingmut ba kyrpang jong ka ka long ban kdew ia ka mynnor, pynban lah ruh ban pyndonkam ban kdew ia ka ban sa jia noh (imminent future) kum ha ka **to nga la wan** ne ka ba dang jia ha ka por kren kum ha **ka ba la bang kata ka sha**.

Nalor ka ba la kdew sha khmat shaphang ka **optionality** jong ka **la** kum ka Past Tense Marker nga kwah ban kdew ba ka don kawei ka jaka ha ka ba ia ka **la** ym lah ban iehnoh. Kane ka jaka ka long ha ki sentens ki ba kren ia ka bym shym jia shisha hynrei ka ba lah ban **jia da la jia** lada la bat ia katto katne ki kyndon ki ba kat kum ka verb ha kata ka sentens. Ia kum kine ki sentens la ong ha ka English ba ki long **hypothetical**. Ha ka Khasi la kdew ba ki long kumta da ka phreis **jia da la** kum ha kane ka sentens: **Ba**

ngan da tip lypa ngan jin da la wan sha phi namar kane. Kane ka jingshisha ka kdew ba ka ktien Khasi ka don ha ka ym tang ia ka **concept of time** hynrei ia ka **tense system** ruh ka ba kdew ia ka por ha ka sentens.

2.3.2. Mynta ngin peit sa ia ka Future Tense. To ngin pyrshang kdew ngi mut aïu haba ngi ong future tense. Na u laiñ por ba la dro sha khmat, ngi iohi ba don lai ki reference time. Mynnor, Mynta bad Lashai. Ka future tense ka dei ka kyntien ne kynnoh ka ba na ka kyrdan (iii) ia ki ba ngi la khot da ka kyrteng **grammatical item**. Ka jingmut ba kongsan eh jong ka **grammatical item** ba la khot ka Future Tense Marker ka long ban kdew ia ki jingjia ki ban sa long ha ka por ban sa wan, kata na ka por kren sha khmat. Ha ka jingkren shaphang kiei kiei ki ban sa wan ngi dei ban sngewthuh ba ngim lah ban kren shaphang jong ki da ka ba da thikna eh namar kiei kiei ki bym pat jia, hynrei ki ba ngi mut kin jia, ki lah ban kylla na ki ba bun ki daw. Ki daw ki lah ban long na ngi hi ne na kiwei pat. Kumta ka ba ngi lah ban leh shaphang kine ki kam ki ban sa jia haba ngi kren shaphang jong ki ka long tang ban shu ïathuh lypa (predict) ba kita ki kam kin sa jia kat kum ka plan ne jingïapynbeit. Ìa ka ba ki jia shisha ne em, ngim ïali ban ong ei ei. Ka ba mih nangne ka long ba ka kam jong ka future tense marker ka long tang ban shu ïathuh lypa shaphang ki jingjia khlem da kdew satia ia ka jingthikna ne jingbymthikna ba ki jingjia kin jia. Ka ba ïathuh lypa ka long ka kam ka ba kyrpang (basic) jong ka Future Tense Marker. Ha ka ktien Khasi ngi ong ba ka **yn/n** ka dei ka Future Tense Marker. To ngin peit la ka long shisha ne em ka kyntien ne kynnoh ka ba ïathuh lypa shaphang ki jingjia. Ka **yn/n** ka ieng ha ka sentens ha ka jaka ba kiwei pat ki modal verbs kum **lah**, **ïai** etc. ki ieng, kata ha shuwa ka verb. e.g.,

7. Ka **lah** slap.

8. Ka **ïai** slap.

9. Ka **yn/n** slap.

(Ngi pynsnoh ia u **-n** sha ka **ka**, kumta ngi ioh **kan slap**). Ka kyntien **lah** (7) ka kdew ba la dep slap; **ïai** (8) ka kdew ia ka ba u slap um sangeh kata, slap shi slap, bad **yn/n** (9) ka shu ïathuh lypa ba kan slap. Tip kan slap ne em ym don ba lah ban ong. Lada pyndonkam ia ka kyntien **lah** ha ka jingmut **ka long ka ba lah** (possibility). Ka kyntien **lah** ha kawei ka liang ka i kumba ka ïathuh lypa. e.g., **Ka**

lah ban slap. Hynrei, kumba ngi lah hi ban iohi na kane ka nuksa, ka dor jong ka jing*i*athuh lypa (prediction) ka long *ia* ka ba la kit da ka **ban** (ba + n) (future tense) ym da ka **lah**. Kane ka jingpyngkut nia ka long ka ba shongnia namar lada weng noh *ia* ka **ban** na katei ka nuksa, ka sentens kan long beit tang kum ka (7) haneng ha ka ba ka jing*i*athuh lypa kam don. Lada ngi shim da ka **iai** bad kren shaphang ka ban sa jia (slap) ngin donkam hi *ia* ka yn/n kumne: **kan iai slap**. Kane namarkata, ka kdew shai ba, *ia* ka ban iathuh lypa donkam da ka **yn/n**, bad namarkata ka **yn/n** ka dei ka Future Tense Marker.

Ka jinglong ba kongsan eh jong ka **yn/n** ka long ba ka *ia* pyrshah bad ka Past Tense Marker **la** na ka jingshisha ba ka long ka bym lah ban shah iehnoh na ka sentens (obligatory). Lada ka jingjia hi ka long ka bym pat jia, u nongkren un ym lah khlem da pyndonkam *ia* ka. Lada um pyndonkam *ia* ka kum ha kine kiei kiei ki ban sa jia, ka jingong jong u kan long ka bym beit bym biang kat kum ki ain Kramar Khasi. Kane ka jingong harum kam beit namar bym don **-n** ha ki jaka ba dei ban don.

*U ong *ia* nga un wan lashai ba u kit noh *ia* ki tiar ki tar baroh.

Na ka liang ka jingsngewthuh *ia* ka jingmut jong ka sentens, baroh ngi sngewthuh, hynrei ngim lah pdiang *ia* kane namar ka jingduna u **-n** kum ka **future tense grammatical marker**. Dei halor kane ka nongrim ba ngi sa ong ba *ia* ka por ha ka sentens *ia* mak da ki **grammatical item** *ia* ki ba ngi khot ki **tense marker**. Nga kwah ban ban sa shisien ba *ia* ka por jia jong katei ka sentens haneng ngi *la* tip/sngewthuh na ka lexical item (lashai), hynrei ka **yn/n** ka long ban kdew *ia* ka jingbeit (grammaticality) jong ka sentens, (kata ban kdew por da ka Kramar).

Ka jingbymbit ban iehnoh *ia* ka **yn/n** ka long ba wat ki future time adverb/adverbial ruh kim lah ban pyndam *ia* ka jingpyndonkam *ia* ka: ym kumba pyndam ki past time adverb/adverbial *ia* ka **la**.

Ka **yn/n** ka lah ban ieng marwei ha ka sentens lada ha shuwa jong ka ym don kano kano ka personal pronoun. Haba ka long kumne, ha ki jingthoh *la* spel dak **yn** e.g. **Yn plie iing mano?** Ka jingspel dak **yn** ka long ka rukom ba *la* bud khnang ba ha ki jingthoh yn ym *l* eh tang kum u dak konsonan **n**. Lada ki personal pronoun ki don ha shuwa

jong ka ka **yn/n** kan snoh ha ki kumne: **ngan, ngin, phan, men phin, kan, un, in, bad kin**. Ka lah ruh ban snoh ha ka **ba** ban long **ban**. Ka kam jong ka ban ka long kum ka infinitive **to** ha ka English. Don ki ba pyrkhut ba ka kyntien **ban** ka dei ka rukom kren lyngkot ia ka **ba yn**. La don ruh ki ba ong ba ha ki jingthoh ba mynshuwa la thoh **ba'n** ha ka jaka **ban** khnang ban kdew ia ka jingjah u dak **-y**. Ka kyntien **ban** kum ka infinitive **to** ka kdew hi ia ka ban sa jia, la ka ban sa jia ka long ha ka mynnor, ne ha ka lashai.

Ka ba phylla ka long ba ka Khasi ka ieh kumto ia ka present tense. Kane ka mut ba yin don ha ka Khasi ki kyntien/kynnoh ki ba dei ki **grammatical item** ban kdew ia ka present tense. Namarkata, ngi ong ba ka present tense ha ka Khasi ka long **unmarked** (byin shym la kdew). Ka daw ka long namar ba ka shaniah ia kane ka kam ha ki present time adverb/adverbial, bad ha ka **dang** ka ba kdew ba ki jingja ki jia ha ka por ba kren. Kata ka mut ba lada u A u ong shaphang u B: **u dang kren**, ka mut ba u B u dang kren ia la ka jong ka jingkren bad ha kata hi ka por ba u A ruh u kren (shaphang u B). Hynrei lada kata ka ba u B u kren ka long ha ka mynnor, u A u dei ban buh ia katei **u dang kren** ryngkat bad ki past time adverbial, e.g., **Ha kata ka por ba u dang kren** etc.

Ka **aspek** ka don ka jingiadei ka ba jan bad ka **mood**. Ka jingiajan ka long namar ba ki don ki kyntien ki ba sawa kumjuh hynrei ki jingmut jong ki ka pher kawei na kawei. Ka ktien Khasi ka don shibun ki kyntien ki ba kum kine, hynrei kanc kam dei ka jaka ban kren shaphang kita. Yn shu kdew tang ia kiba ia dei bad ka mood bad aspek. Shuwa ba yn leh ia kata, donkam ban sngewthuh nyngkong ka mut aü ka kyntien mood bad aspek.

3.1 Mood

Ka thew ia kito ki kyntien ki ba kdew ia ka jingsngew (attitude) jong u nongkren. Ki jingsngew donbor ne kham halor kat ban hukum ia kiwei. e.g. **Ei ale hangne!** Ka jingsngew ka ba kum kane ka iaidei bad paw lyngba ka sur kren. Hynrei don pat ki briew ki bym da kwah eh ban pynpaw jingsngew khraw ei ei, bad haba ki dei ban ong kum ia katei ka jingong, ki ong da ka sur ka ba jem. Teng teng ki buh ruh bad ka kyntien **sngewbha** ha khmat, hapteng ne hadien eh jong ka jingong. Haba don ka kyntien **sngewbha** na khmat eh, ka kyntien **ei** ka duh noh. e.g.,

Sngewbha ale hangne.

Ei sngewbha ale hangne.

Ei ale hangne, sngewbha.

Ki sentens ki ba kdew ia ka hukum e.g., **Khang kato ka jingkhang! Shong hangto!** etc. ki long kito ia ki ba la khot ha ka Kramar ka **Imperative Mood**.

3.2. Ha ki Kramar ki ba pher ba pher don ki jingkdew ba ki sentens ki bym da pynpaw ia kano kano ka jingsngew u nongkren ki dei ka Indicative Mood. Ha kum kine ki sentens ka jingkdew ka shu long beit tang ka jingshisha ba shisur ha kata ka sentens. e.g.,

Ka briew ka kit maw.

U khynnah u lehkai um.

Ki sentens ki ba don ki kyntien **lada, la, da, lynda** ki ai ka kynjia jingied (alternative) ia u ba sngap, bad ia kine la khot ka **Subjunctive Mood**, e.g.,

Lada phi icit ia nga, sumar ia ki hukum jong nga.

La phi leit ne phim leit, nga te nga la leit.

Da u wan te sa ai artad kato ka jaiŋkup.

Lynda phi leh shutom te phin ym lah ho!

Kine ki kyntien ki ba mak ia ka Subjunctive Mood ki don lut ha shuiwa ka pronoun/noun. Nalor kine, don sa san tylli ki kyntien ki ba kdew ia ki jingsngew jong u nongkren bad kita ki long: **dei, hap, lah_m¹, da_m², shu**.

3.3. Dei: Kane ka kyntien ka don lai tylli ki jingmut: (i) Kum ka verb, ka long kum ka kyntien **long**. Ka **Model English Translation** ka pynkylla Khasi ia ka kyntien English is kum: **long, don, dei**.

Kane ka jingpynkylla ka long ka ba dei namar haba ngi pynkylla Khasi ia ka sentens: **He is John**, ngi loh **u dei/long u John. Dei** bad **long** ki ia ryngkat ha ka jingmut bad jingpyndonkam (kum ka verb). Ka phei na ka **don** wat la **don** ka mut **is** ha ka English.

(ii) Kum ka verb ka kren ruh ia ka jingfadel (relationship) para brierw ne bad ki kha ki man. Lah ban pyndonkam ia ka kumne.

Kylli: Phu **dei** ant ia I Bah Rim.

Jubah: Ngam **dei** ei ei/Nga dei Pasan.

(iii) Ka jingmut ka ba lai jong ka kyntien **dei** ka long kum ka modal auxiliary ka ba kdew ia ka jingsngew shah teh (obligation) ne ka jingsngew dei u nongkren ban leh ei ei. Teng teng la buh ia kane ka kyntien **dei** da ka kyntien **donkam** ban pynpaw ia kane kajuh ka jingsngew, tangba ka kyntien **donkam** hi ka kham thiew ia ka jingsngew donkam kham tam ban ia ka jingsngew shah teh. Ban pyniapher ia

-
1. **lah_m** ka mut **lah** kum ka modal marker. La buh **m** napoh ban pyniapher ia ka na ka **lah** (perfective). Yn sa batat ia kane ha ka Aspect.
 2. **da_m** ka mut **da** kum ka modal marker. La buh **m** napoh ban pyniapher na kiwei pat ki **da** (subjunctive) bad **da** (durative). Ia kane yn sa batat ha ka Aspect.

ka **dei** kum ka modal auxiliary na ka **dei** kum ka verb ngin mak ia ka, **dei_m**.

Nga **dei_m** leit sha skul lashai.

Ki **dei_m** pyndeng syntiew ki khynnah Klas X.

dei_m, ngi dei ban kynmaw ka don borabor ha ka liang kadiang na ka Verb, bad ka lah ruh ban shah pynbud ha ka **ban**, nangta sa bud sa ka verb, kumta ba ka thup kyntien ka long noh **dei ban + V.** e.g., **Nga dei ban leit shnong lashai.**

3.4. Kawei pat ka modal auxiliary ka dei ka kyntien **hap**. Kane ka kyntien ka kdew ia ka jingbym banse ne jingbym lah kiar na ka liang u nongkren. Ha kane ka liang ka i kumba ka long kajuh bad ka **dei_m**. Hynrei ka don hi katto katne ka jingiapher. Ka **dei_m**, kam don ha ka ia ka jingsngew shah pynbor ka ba don ha ka **hap**. Haba u briew u ong: **Nga hap leit**, ka i kumba une u briew u shah pynbor ha kiei kiei ki ba sawdong jong u (circumstances) kumta ba um lah kiar khlem leit. Ka **hap** ruh kum ka **dei_m** ka lah ban shah pynbud shuwa ha ka **ban**, bad nangta sa ka verb kumne harum.

U Tip u hap shong noh ha iing.

U Tim u hap ban shong noh ha iing.

3.5. Ka **lah_m** ka long kum kawei pat ka kyntien **lah** ka ba ka jingmut jong ka ka long **la dep**. Ia kane yn mak ia ka **lah** (perfective). Ka **lah_m** pat ka thew ia ka jinglah (ability) ne jingnang kum ha ka ba ong:

Nga lah ban kdiah ia unc u dieng.

Ka **lah_m** ka kdew ruh ia ka jinglah ban long (possibility) jong kiei kiei, ka jinglah ban long ka ba mih na ka ba u briew u peit thuh ia ki dak ki shin bad u pynwan nangta. Haba u iohi ba ka dum ka bneng, don sa bad ka lyer, u pyrkhat/sngew ba lehse u slap um jngai shuh. Ban pynpaw ia kane ka jingsngew u ong:

Ka lah ban slap pynban mo!

Kiwei pat ki nuksa ki long:

Kane ka kynroh ka lah ban twa.

Ka thma ka lah ban kut shen.

Ngim dei ban klet ba ka **lah_m** ka don ruh sa kawei ka kyntien ka ba ka kynnoh bad sur sawa ka long kumjuh

hynrei ka ba ka kam (function) jong ka, ka long kum ka verb. e.g.,

Kylli: Lah mano?

Jubab: Lah ki Nongthymmai.

Ia kane ka **lah**, lah ban bujli da ka kyntien **jop**, namar kum ka verb, ka **lah** ka mut hi kumta. e.g.,

Kylli: Jop mano?

Jubab: Jop ki Nongthymmai.

Kum ka verb **lah** ka mut ruh **leh bha/jop** ha kata ka jingthmu/jingialeh. Haba ki khynnah skul ki ialch eksamin, ynda haba ki la dep thoh, ka jingkylli borabor ka long **Phi lah?** Bad ka jubab ruh ka lah ban long **lah hi**.

3.6. Ka **da_m** kum ka modal auxiliary ka kdew ia ka jinglong kumba ka long (actuality). kata, lada ka verb ka long e.g., **khang** bad kane ka verb ka iaid ryngkat bad **da_m** kum **u da khang ia ka jingkhang**, ka jingkdew ka long ba ka ba khang ia ka jingkhang ka long ka ba jia shusha lane ka ba da thikna, bad ba kane ka jingkhang ka long ka ba da leh kyrpang, lehse, wat haba yin donkam eh ban da khang.

Nalor ka **da_m** don sa kiwei pat ruh ki **da** ha ka Khasi. Kawei na kita ka dei ka verb bad ka jingmut jong ka, ka long **sumar/ker**, bad ban kdew ia ka tiar ne mano mano ba da (instrumental). e.g.,

U Blei hi un **da** ia ngi na ka ba sniew baroh.

To **da** lem ia i Rit **da** kato ka shatri.

Kawei pat ka **da** long ka aspek marker ka ba ju don hapteng ar tylli ki verb e.g. **Kren da thiah**. Yn sa kdew biang ia kane ynda la batai ia ka aspek.

3.7. Shu (indeterminacy) ka kdew ia ka jingbymlah ban leh da kumwei lait na kata ka ba la leh (kat kum ka verb). Kane ka mut ba haba u briew u ong: **Nga shu shong kai** ka jingmut ka long ba uta u briew um shym leh ei ei nalor ka ba shongkai. Kane ka jingpynsgew sha kiwei ba u khlem leh ei ei nalor ka ba shong kai teng teng ka long ban buhrie^h ia ka daw ba shisha jong kata ka jingshong hangta. Ka kyntien **shu** ka buhrie^h ia ka jingbymkwah iathuh ia ka daw. Ka jingbymlah ban leh da kumwei pat lait na kata ka ba la leh (kat kum ka verb) ka paw eh ha kum kane ka jingjia harum.

U Lan u ong ia u Ton ban ong ha u Don ba u Don un wan ia kynduh ia u (Lan). U Ton pat ha ka jingsngew jong u, u sngew ba u Don un nyin wan ia kynduh ia u Lan wat lada ong makna ruh. Kumta u Ton u jubab: **Ngan shu pynong!**

Kane ka jubab ka mut ba u Ton u ong ba un leh ia ka ba la ong ia u ban leh, hynrei ha ka jingsngew jong u, u Don un yin wan hi. Ka mut ruh ba u Ton u pynpaw ha kam shong ha u ban pynwan ne ban yin pynwan ia u Don sha u Lan.

Kun ka modal auxiliary ka **shu** ka don borabor ha ka liang kadiang ka verb. Kane ka **shu** teng teng ka trei (function) ruh ia ka kam kum ka verb ha ki jingong kum kine:

Nga shu bad u Trai ha la ka sngi.

Une te shu tang bad phi.

3.8. Ka **Aspek** ka pher na ka mood ha ka ba kam kdew satia ia ki ba kum kitei ki jingsngew. Ka kam jong ka ka long ban peit ia ki kyntien ki ba na khmat ka verb (per verbal) ki ba lah ban batai (modify) ia ka verb kum ka kam (activity). Kumta ka aspek ka peit ia ka kam kum ka ba jia shi jia, ia ka kam ba ka dang jia ha ka por ba kren artad shaphang jong ka; ia ka kam ba ka dang jia ha ka por ba kren artad shaphang jong ka; ia ka aspek la phiala ha ki ar bynta ba kongsan: Ka **Perphektip** (Perfective) bad ka **Imperphektib** (Imperfective). Nyngkong ngin peit ia ka Perphektib.

3.9. Ka perphektib aspek ka peit ia ka kam jong ka verb la kumba ka long kawel kaei kaei ka ba tylli. Kane ka kyntiup ia ka ba sdang bad ba kut jong ka kam. e.g., Lada ong **nga lah bam soh**, ka jingpeit ka long ia ka kam bam soh naduh ba sdang haduh ba kut. Hynrei ynda bishar bha ia ka jingong **nga lah bam soh**, ka i kumba kane ka kham lam ia ka jingmut jingpyrkhat jong ngi sha ka jingshisha ba ia u soh la bam. Yin don jingkdew la u soh u long uwei ne ar ne katba don ha u dieng/iing. Ka jingong ka shu iathuh beit ba ka kam bam soh ka long ia ka ba la dep. kata u soh u la rung shap kpoh. Ka kyntien **lah** ha ka jingmut ka ba kum kane (kdew ia ka jingdep) ka mak ia ka perphektib aspek ha ka Khasi.

3.9.1. Ka kyntien **lah** (perfective) ka don ha ka ia ka jingkdew sha ka mynnor. Ka mynnor ka lah ban long ka ba jan

(immediate past) kum haba u briew u dang nih na ling shetja u da niad artad ia ki kti bad shyntur - ka shyntur ka ba symphleih; la ithuh hi ba dang dep bam ja - bad u ong artad **Nga lah bam ja ho ma nga!** Lane ka mynmor ka lah-ban long ka ba la slem bha kum: **Ki lah thied ia kato ka ing naduh snem sanpnewsan.**

Lada u nongkren u kwah ban kdew shai ba ka kam ka don ka jingfadei ka ba jan bad ka mynta (current relevance) yn pyndonkam lang ia ka **lah** bad ka **dang** tangba ka **dang** ka dei ban lamkhmat e.g., **u dang lah thet.** Kum ha kane ka jingjia ka perphektib marker ka ia ryngkat ha ka jingmut bad ka kyntien **dep** bad lah ruh ban buh da kane ka kyntien ha ka jaka ka **lah** e.g., **u dang dep thet.** Kane ka jingbujli kyntien kam wanrah kano kano ka jingkylla ha ka jingmut. Ka jingfadei bad ka mynta lane **current relevance** ba la kdew haneng ka thew ia ka jingnih na kata ka kam. bad ba kata ka jingnih ka long ka ba dang bang bha ha ka mynta ruh. e.g., Haba u briew u ong. **Nga dang lah thet,** ka jingnih ka long ba ha ka por ba u ong ia kane u sngew ba ki kti jong u ki dang khud.

Ka kyntien **lah** (perfective), na ka daw ka jingkdew jong ka sha ka mynmor (implicit past), ka don ka jingfadei ka ba jan bad ka past tense marker **la.** Don ki ba pyrkhat ba kine ar ki dei kawei ka kyntien ia ka ba la kymnoh **la** da kiwei bad **lah** da kiwei pat. Hynrei ka jingshisha ba kine baroh ar ki lah ban ia don lang ha kawei ka sentens, e.g., **Ki la lah leit** ka pypaw shai ba kine ki dei ar tylli ki kyntien. bad haba kine ki ia don lang kumne ki pynioh ha ka sentens ia baroh ar ki jingmut, kata **Past** bad **perfective.** Kane ka ia dei bha bad ka **Past Perfect** ha ka English kum ha ka sentens, **They had gone.**

Ka kyntien **lah** (Perfective) hadien ba ka la ia don lang bad ka verb (lah + V) ka lah ban shah bud sa ha ka kyntien **artad,** e.g., **U lah wan artad.** Kum ha kane ka jingfadon lang, ka jingmut kam long shuh ia ka jinglap hynrei ia ka jingdep jong ka jingjia ka ban sa bud shen. Lada shim ia katei ka sentens ngi sngewthuh ba uta u briew um pat wan tangba un wan shen. Shuh shuh lada ngi shim ia ka sentens: **Ka sngi ka lah sep artad** ngi sngewthuh ba ka sngi kam pat sep tangba ka por ka la dei janmict, ka sngi ka la noh shaphang sepngi bad ka la sdang saw byrhuih bad sa tang katto katne por kan sa sep noh hi.

Ka kyntien **lah** (perfective) ka lah ban ia don lang bad kiwei kiwei pat ki kyntien kum **lai**, **shait** etc. Yn sa nang kdew ia kane.

3.10. Ka Imperhektib aspek pat kam peit ia ka kam kum kawei (whole) hynrei lyngkhot lyngkhot bad ka kynthup ia ki ba bun ki aspek kum ka jingneh ne jinglan ka jingjia, ka jingjai jia, ka jingmlen etc. Ngin peit nyngkong ia ka kyntien **dang**.

3.10.1. Dang (durative) ka kren shaphang ka jingiar (span) jong ka jingjia, shaphang ka jingiarangkat ka jingjia bad ka por kren (kata, haba kren shaphang kata ka jingjia, ka jingia ruh ka nang jia). e.g., **Haduh mynta ruh phi dang pang?** Kane ka kdew ba ka jingpang ka la sdang kham mynshuwa, tangba kata ka jingpang ka neh, kata ka iar naduh ka por ba mynshuwa haduh ha ka por ba kren/ong ia kane ka jingong. Ia ka jingiatban hapdeng artylli ki kam ruh lah ban kdew da ka kyntien **dang** ha ka subordinate clause. e.g., **Nga la rung haba u dang khreh kot.** Ka jingrung ka long ha ka mynnor (la) bad haba kane ka kam (rung) ka jia kawei pat ka kam (khreh kot) ruh ka dang jia. Ka kam **khreh kot** ka la lah ban sdang la kham slem bad kham shuwa ia ka **jingrung** tangba ha ka por ba rung ka kam khreh kot ka dang ia id shaphrang.

Hynrei lada ha ka main clause ka kynhun ki kyntien ba dei bad ka verb ki long **nang + V**, ka kynhun **dang + V** ha ka subordinate clause ka kdew ba ka jingjia ha ka main clause ka jia **hapoh** jong ka por (span of time) ba ka jingjia ha ka subordinate clause ka jia. e.g., **U nang khreh kot katba ki para ki dang iohthiah.** Ki jingjia ki long **khreh kot** bad **thiah**: ka jingkdew da ka **nang** bad **dang** ka long ba ka jingjia **thiah** ka dang ia id (ongoing) bad hapoh jong kane ka por kawei pat ka jingjia (khreh kot) ruh ka nang ia id. Ka jingkdew ka i ruh kum ban ong ba une u ba khreh kot u khreh kot ban pynmyntoi ia ka por. Kine ki jingjia ki jia hamar kajuha ka por tangba kawei hapoh kawei.

Haba **dang + V** ka ia id ryngkat bad ka past time adverbial ka jingkdew ka long ba ka jingjia ka ba la jia ha ka mynnor ka dang long ka ba don jingmut (current relevance) ha u nongkren. e.g., **Nga dang wan London mynshem snem.**

Ka **dang + V** kam kham ia id bad ka la e.g., * **Nga la dang sad.** Ha ki jingthoh ki ba kham rim ka don ka ba kum

kane ka rukom thoh hynrei imat ka mih na ka ba transleit ia ka English **past + V- ing** (was doing). Ha kine ki sngi mynta ym kham iohsngew ne iohi shuh ia kum kane i.e., **la dang + V**.

Ha ka ba kren shaphang ka present tense ngi la kdew ia ka jingshisha ba ka Khasi kam don present tense marker. La batai lehse ia kiei kiei ki ba jia **mynta** la shu shaniah ban kdew da ka kyntien **dang**. Ka lah ban long kumta, tangba ngi dei ban sngewthuh ba **dang** ka ia ryngkat bad ka **-ing** jong ka English verb (e.g. do + ing = doing); bad ba ka **dang** ka lah ban long ha ka mynnor, mynta bad lashai ruh. e.g.,

Mynhynnin, u dang tem jingtem haba nga kren ia u.

Myntan kumne i dang don ha ing!

Lashai, katne por u dang don ha erpod (airport).

3.10.2. Da (durative) : Kawei pat ka durative marker ka dei ka kyntien **da**. Ngï mak ia ka durative ban pyniapher na ka **dang** (durative). Kane ka kdew ia ar tylli ki jingjia ki ba jia thik ha kajuha ka por (simultaneity of events) bad ki jingjia ia ki ba la kdew da ar tylli ki verb kiba don ha kajuha ka kyntthup kyntien ia ki ba la pyniasnoh (linked) kawei bad kawei da ka durative, **da**, e.g., **U kren da thiah/da shong**.

Kane ka kyntien **da** ka don ruh ha ka, ka jinglong jong ka modal auxiliary ka ba kdew ia ka jinglong kumba ka long (actuality) kata ka jingjia e.g., **U leit sha la u kpa u da iam**. Ka jingleit bad jingiam ki lah ban sdang la ka jong ka jong. Haba **u leit sha la u kpa**, lehse u leit khlem iam, bad u sa dang iam ynda la iakynduh ia u kpa! ka jingkdew ka kyntien **da** ka long ba ka jingiam ka long kaba da jia shisha. Ia kane ka **da** ngin mak **da_m** (i.e., da + modal)

3.10.3. Nang (progressive) ka kdew ia ka jingiaid shaphrang (progression) ka kam. Haba pyndonkam ia kane ka thup kyntien **nang + V**, ki ba bun ki Khasi ki ban/ong ia ka arsien **nang + V nang + V** (nang san nang san). Hynrei haba pyndonkam ia ka **nang** ha shuwa ka causative, e.g., **pyntwa**, ka jingong arsien ka long tang ia ka causative verb, e.g., **nang pyntwa pyntwa**.

Ka nang + V ka kdew ia ka jingiaid ka kam ha ki khen ki ba bun kumne:

Ngan wan phra baje nang khreh lypa hol

Katta ruh phim dep, sa nang wan.

Ha ka **nang khreh lypa** ka jingkdew ka long shaphang ka jingkhreh ka ba **ha shuwa** ban wan, bad ha ka **sa nang wan** ka jingkdew ka long ka jingfaiid ka kam **hadien**.

Haba transliet sha ka English ka **dang** bad ka **nang** ki shim ia ka - **ing** jong ka verb. e.g., **Ki dang pynheh surok** (They are widening the roads); **ki nang pynheh surok** (they are widening the roads). Hynrei ha ka jingmut pat ki ia pher. Ka ba da ka **dang** ka shu kdew beif ba ka jingpynheh surok ka **dang** long haduh ha ka por ka kren; katba ka ba da ka **nang** ka kdew ba ka jingpynheh ka long shuh shuh; ha kane ka rukom ka translesion jong ka **Ki nang pynheh surok** ka dei ban long **they are widening the roads more and more**.

Ka progressive marker **nang** ka kdew ia ka jingfaiid shaphrang ka jingjia ia ka don ha shuwa kano kano ka verb ruh. Kane ka mut ha wat ki verb ki ba kdew ia ka jingkut e.g., **poi,iap, sangeh**, ynda haba ki shah lau klimat ha ka **nang** kum **nang poi, nang iap, nang sangeh** ka jingkdew kam long shuh ia ka jingkut (termination) hynrei ia ka jingfaiid shaphrang hi (progression). e.g.,

Ki briew ki nang poi (nang poi) ha ing.

Ki sla ki la nang iap man ka sngi.

ka jingkhynwin ka nang sangeh sangeh.

3.10.4. Iai bad dem kum ki **iterativity marker**. Kine ki kyntien ha la ka jong ka jong ki kdew ba ka kam/jingjia ka **jia bun sien** bad ka jia ruh da ka ba am (persistence). Kata, da ka jingthmu ba ka jingjia kan jia khnang bunsien. Lah ban ia bujli ia ki kyntien **dem** bad **iai** khlem da don jingkylla ei ei ha ka mining, eg.,

U **iai/dem** leit kai ha iing u Jim.

Ka don ka jingeh ban pyniapher ia ki **iterativity marker** na ki **habituality marker** (ju/shait) namar baroh ar ki kren shaphang ki kam ki ba jia bun sien. Ka jingfapher hapdeng kine ar tylli ki sentens harum ka long tang na ka liang ka **jingam** bad **jingmlien**.

U **iai/ dem** leit khwai man la ka step.

U **ju/shait** leit khwai man la ka step.

3.10.5. Ju bad shait ki kdew ia ka jingmlien (habituality). Ha ki ba bun ki **khep** kine ki kyntien **ki** long ki ba lah ban

ia bujli khlem kano kano ka jingkylla ha ka mining. Hynrei don ki briew ki ba pyndonkam ia kine baroh ar ha kajuh ka sentens. e.g., **U ju shait khang khyndai baje/u shait ju khang khyndai baje.** Haba bishar ia kine ym iohi ba kin pher na ka ba ong **u shait khang khyndai baje/u ju khang khyndai baje.** Ym i ruh ba ka jingbuh lang ia ka **ju bad shait** ha kajuh ka sentens ka wan rah ia ka jingban (emphasis) ia kata ka jingong.

Kine ki **habitual marker ju bad shait** ki kdew ba ki jingjia ki long ki ba shisha ha ka mynmor (true in the past) bad ki lah ruh ban long ki ba shisha haduh ha ka por ba kren. Lada u nongkren u kwah ban pynthikna ba ka jingnlien ka long ka ba shisha haduh ka por kren, u lah ban kdew ia kane da kawei pat ka klos (clause) e.g., **U ju trei shitom bha bad haduh mynta ruh u dang trei shitom hi.**

Haneng ngi la kdew ba **ju bad shait** lah ban ia bujli. Hynrei ki don ka jingiapher hapdeng jong ki na ka liang ka jingiadon lang (co-occurrence) bad kiwei pat ki kyntien kum **ym, shym, khlem** (negative marker) kumne harum.

Ka **ju** ka lah ban shah lam khmat ha kitei ki negative marker ha ka sentence ki ba dei (i) Ki jingong bad (ii) ki jingkylli, e.g.,

Um ju bam ei ei mynstep.

Kam shym ju pdiang ia ki jingtyrwa jong u.

Ka khlem ju patiw ia ka ba kren.

ia kine kijuh ki sentens (jingong) lah ban pynkylla sha ki jingkylli da ka ba buh ia ki sur kylli ha ki bad ha ki jingthoh da ka ba buh dak jingkylli (?) hadien kawei pa kawei na ki.

Ka **shait** kam iaaid ryngkat bad ki negative marker ha ki jingong, hynrei ka leh kumta ha ki jingkylli. e.g.,

Um shait leit ha iing i Maidong?

Kim shym shait shong da ki kali kulai mynshuwa?

Phi khlem shait die jaiñ heit?

Ka jingiadon lang jong ka **shait** bad ki negative marker ka long tang (i) ha ki jubab ban pynkheif (negate) ia ka jingong ka bym shisha (false statement); (ii) haba ha ka jingong, u nongkren u lah buh lypa ia ka kyntien **shait**.

Kane ka mut ba ka **shait** ka shu sawa (echo) biang ha ka jubab tang namar ba la pyndonkam lypa ia ka. Kum ki nuksa:

Jingong bym shisha : U shait leit khwai man ka sngi.

Jubab ban pynkhem : Um shait leit khwai man ka sngi.
ia kane:

Lane

U khlem shait leit khwai man ka sngi.

Lane

Um shym shait leit khwai man ka sngi.

3.10.6. Sa (Sequential): Ia ka kyntien **sa** la ong da u Nissor Singh ba ka dei ka future tense marker. Hynrei kam dei. Ia kane ka jingong la nang pynskhem shuh shuh da ka jingshisha ba ka **sa** kam lah ban ia don lang bad ka **la**. ***U la sa leit** kam long ka ba lah ban pdiang kum ka jingong ba don jingmut. Hynrei **sa** kam dei ka future tense marker. Ka dei ka **sequence marker**, kata. ka kyntien ka ba kdew ia ka jingiadud jong kawei ka kam hadien kawei pat. Ngin ioh shai ia kane ka jingmut lyngba kane ka sentens harum.

U sa ai ia ka sati ha ka.

Ka kyntien **sa** ka kdew shai ba ka jingai sati ka long hadien kiwei pat ki jingia ia ki ba ym shym la kdew hangue. Lada weng noh ia ka **sa** na katei ka sentens. ym ym ioh satia ia kane ka jingmut.

Kum ka **sequential marker** ka **sa** (wat la kam lah ban **ia** don lang bad ka la) ka lah ban kdew ia ka jingiadud ki kam ha ka mynnor bad ia kane lah ban sngewthuh na ka kontek ne na ki past time adverbial. Lada ha ka mynta ka jingkdew ka long da ka kontek bad ha ka lashai da **yn/n**.

Kawei pat ka jingmut ba donkam jong ka kyntien **sa** ka long ba ka ai lad ban pynslem ha ka jingpyndep ia ka kam. Kam shah ban ym pyndep tangba u brier u lah ban shim katno katno ka por ban pyndep ia kata. Kumta lada u nongkren u ong: **Ngan sa wan**. Ka jingmut ka long ba u teh ia lade ban wan tangba ia ka por wan. ym shym pynthikna. Ka dei halor kane ka jingmut jong ka **sa** ba ngi sa ioh ki jingong kum: **Phi te, sa shi sa**.

3.10.7. Ka **sa** ka lah ban lam shwa ia ka **ban + V** kum: **Sa ban + V**. Ha kum kane ka jingiadon lang ka jingkdew kam

long shuh ia ka jingabud ki kam hynrei ia ka prospective aspect, kata ia ka **jingban sa jia noh** kiei kiei. e.g.,

U Hari u sa ban leit sha Delhi.

Kito ei. sa ban leit artad!

Teng teng ka **sa ban** ka pait sha ki laut kyntien lada ki nongkren ki kwah ban pynsoli ia u **-n** ha ka personal pronoun. e.g., Kito ei **sa ba kin** leit artad!

KA JINGIAKHLEH KI ASPECT MARKER BAD KI MODALITY MARKER

Ha ka lynnong shaphang ki Aspek Marker la kdew ba ki aspect marker ki teng ha 'kajuh' ka jaka ha ka sentens bad ki **modality marker**. Haba ong 'kajuh' hangne ka mut beit sha ka liang kadiang na ka verb. Ym pat shym kdew katno ki jngai ne jan ia ka verb. Teng teng ka jingjan ka long mar khap bad ka verb, teng teng pat haba don palat ia kawei ka aspek marker bad shuh shuh lada don ha kajuh ka sentens sa kano kano ka modality marker, ka jaka jong ka aspek marker ka kyuriah noh kham sha kadiang shuh shuh na ka verb. Ka jingkyuriah jong ki marker ka shong kat kum ki aiñ ba ka ktien ka buh halor ka jingpyndonkam ia ki. Ka jingdon lang jong ki aspect marker ka ktah ia ka jingmut baroh kawei ka sentens. Kane ka mut ba lada ha ka sentens don lang ka **perphektib** bad **habitual marker**, ka sentens ka ioh ia ki jingmut na baroh ar ki marker. Sa kawei ka mat ka ba kongsan shaphang kine ki marker ka long ba haba ki ia bujli jaka ka jingmut ruh kham bunsien ka kylla. Haba kren shaphang ka jingiakhleh ki marker, dei ban kdew lypa hangne ba don katto katne ki marker ki bym lah ban ia khleh bad kiwei pat, lane ba ka jingiakhleh ka long tang ha kawei ka rukom (one order). Yn sa nang kdew ia kine katba nang iaid artad.

Mynta ngin peit ia ka **lah** (perfective). Kane ka lah ban don ha syndah ka verb haba ym don kiwei pat ki aspect marker nalor jong ka. e.g.,

Ki lah shoh kba.

Ki lah dep kam.

Hynrei ka **lah** ka kynriah sha kadiang ban ai jaka ia ka **nang** (progressive), **ju** (habitual), **ial** (iterative), **da** (da_m), **sa** **ban** (prospective), bad **shu** (indeterminate) kumne harum:

	nang	
	ju	
	iai	
	ia	
	sa ban	
Ki lah	da _m	shoh kba.
	lah _m	
	shu	
	dei _m	
	hap	

Kitei ki marker ym tang ba ki bud nadien ka **lah** kumba la kdew, hynrei ki lah ban nang niat ia ka **lah** sha kadiang shuh shuh khnang ban ai jaka ia ki ban ia don lang ha ka sentens e.g.,

	ju	
	iai	
	ia	
	sa ban	
Ki lah nang	da _m	shoh kba.
	dei _m	
	hap	
	lah _m	
	shu	

Na ka ba la kdew haneng, ka paw shai ba haduh lai tylli ki aspek marker lane ki aspek bad modal marker ki lah ban don ha kajuha ka sentens. Hynrei kam kut tang katne. Haba kdew ia ka ba lah ban long (ideally) khlem da kren ia ka ba ki paid Khasi ki leh ne kim leh, lah ban ong b a haduh hynriew tylli ki marker ki lah ban don ha shuwa ka verb. Peit ia kane ka sentens harum.

Ki lah nang ju iai ia dei_m shoh kba.

Ki lah sa ban nang shu ia hap shoh kba.

Ki lah sa ban nang ia dei_m shoh kba.

Lehse ki ba bun kin ym pyndonkam haduh hynriew tylli ki marker, ar lai lane saw tylli ka long ka ba kham ia

pyndonkam paidbah. Hynrei kam long ka bym lah long ban don hynriew.

Ki nuksa ki ba sha khmat ki pyni shai ba ka **lah** ka kynriah haduh san jaka na ka verb ban ai lad ia kiwei pat ki marker ban don hapdeng jong ka bad ka verb. Ka ba donkam mynta ka long ban peit sa ia ki jingkylla jaka ki marker.

Haba **nang** ka bud ia ka **lah** kum **ki lah nang pynkhuid ing**, ka jingmut ka long **perfective progressive**. Kane ka mut ba kane ka kam pynkhuid iing ka la ia'id shaphrang bad mynta katto katne bynta na kata ka kam ka la nang dep. Hynrei lada buh ia ka **nang** ha shuwa ka **lah** kum **ki nang lah pynkhuid ia ka ing**, ka jingmut ka kylla sha ka progressive perfective. Ka jingmut jong kane ka long: Ka jing'aid shaphrang (nang) jong ka kam pynkhuid iing kat haduh ba la dep (lah) ka long namar ka jingkhmih lynti ba kiei kiei kin long kumba la thmu. hynrei haba kum long, ka progressive perfective (nang lah + V) ka pynpaw ia ka jingdukha namar ka jingbym khmih lynti.

Ka **lah** kat kum ki nuksa ba sha khmat ka lam khmat ia ka **iai ia**. Ha kane ka rukom don lang (**lah iai ia +V**) e.g., **lah iai ia kren**. Ka jingmut ka long **perfective iterative reciprocal**, kata, ka kam kren ka long ka ba la dep la bunsien da baroh ar liang (nongkren bad nongsngap). Hynrei ka **lah** (perfective) kam lah ban bud nadien ka **iai** bad **ia**. Hateng hateng ngi iohsngew ki jingong kum kine harum.

Ki iai ia lah_m kyrshan hi ki hynmen keih!

Ki iai ia lah_m kyrshan sah shano?

Kumba la pyni da ka ba mak **lah_m**, ka **lah** hangne kam dei ka perphektib hynrei ka modal **lah** ka ba kdew ia ka jinglah ym ia ka jingdep.

Lada bad ka **ju** pat ka **lah** ka lah ban don nadien lane na khmat, tangba ka jing'abujli jaka ka wallam ia ka jingkylla ha ka jingmut. e.g.,

Ka lah ju leit iew.

Ka ju lah leit iew la katta.

Ka sentens ka ba don **lah ju** ka batai ia ka kam leit iew kum ka ba la ju mlien. Hynrei ka sentens ka ba don **ju lah** ka kdew ba ka jinglah dep leit iew ha kane ka por ka long ka ba ju long borabor.

Ka **lah_m** ka lah ban búd ía kitei baroh ar ki marker,
kata **lah ju lah_m** e.g.,

U Mon u lah ju lah₁ bam lai tylli ki syiar shi sien bam.

Ka **lah** ka lah tang ban lam khmat ía ka **sa ban**. Kam
lah satia ban bud nadien **sa ban**. e.g.,

Nga poi haba ki lah sa ban leit.

*Ki sa ban lah leit.

Ka modal **lah_m** te ka lah ban don hadien ka **sa ban**.
e.g.,

Ki sa ban **lah_m** leit.

Ka **lah** lem bad kiwei pat ki aspek marker ha ka
pingiaeng lang bad ki modal auxiliary, na ki nuksa ba la
kdew sha khmat ngi íohi ba ka kynriah sha kadiang kumta
ba baroh ki modal auxiliary ki ieng mar syndah bad ka
verb. Kine harum ki long ki nuksa ki ban nang pynskhem
shuh shuh ía kane ka jungbatai shaphang ka Khasi.

Ki lah hap leit noh mynhyumin.

Ki ju dei_m thung deng soh mynta u bna.

U ju/íai lah_m bam katne katne.

Ki juj/nanglah/da_m leit da lađe.

Ki lah/ju shu leit lypa.

Lait noh tang ka **ía** ka bym shah ba pynbud da ka da_m,
bad ka **shu**, hynrei baroh ki modal auxiliary ki ieng syndah
syndah ka verb.

* Ki ía da_m leit lang baroh shi shuong.

Nujor bad

Ki da_m ía leit lang baroh shi shuong.

*Ki ía shu pynlut ei ía ka por.

Nujor bad

Ki shu ía pynlut ei ía ka por.

Ha kiba bun na ki nuksa ba la kdew sha khmat la pyni
ía ka jinglah ka **lah** ban ía don lang bad kiwei pat ki aspek
bad modal marker. Na ka ba yn kdew harum, ngin íohi ba
ka **lah** kam lah ban ía don lang bad ka **dang** (durative), **da**
(durative), bad **sa** (sequential). e.g.,

* Ka lah dang shna shuki.

* Ka lah da (durative) wan phai.

* Ki lah sa pan kwai.

Ka iingiadon lang ka **kam + dang** kam long ka ba biang ha ka Khasi namar ba kaei kaei ka ba la dep (perfective) kam lah ban long ka ba **dang** (durative) jia ha ka por ba kren. Kynrei ka **dang** ka lah ban shah bud ha ka **lah** (dang lah + V) e.g.,

Ki dang lah shna ing.

Ka jingmut jong kane ka long ba kata ka kam shna ing ka ba la dep ka long ka ba dang dep shen bad ba ha ka jingmut jong u nongkren ka jingshisha ba lah shna ing ka long ka ba thymmai bad ka ba dang don jingmut haduh ha ka por ba ong ia kane (current relevance).

Kum ka **dang** ka **da** (durative,) kam lah ban bud ia ka **lah**. Hynrei ngi ju iohsngew borabor ia ki jingong ha ki ba ka kyntien **da** ka bud ia ka **lah**. e.g.

Ki lah da_m wan, du khatei!

Na ka jingmut ka ba don ha kane ka jingong. kata, ba kita ki briew ki lah wan shisha (actually) ngi lah ban sngewthuh ba ka kyntien **da** hangne kam dei ka durative, kum **bam da thiah** hynrei ka dei ka modal auxiliary

Ka **lah** kam shah ba ka **sa** kan bud ia ka. Lada kine ar ki ia don lang hajuh, ka **sa** ka dei ban wan ha shuwa ka **lah**, e.g.,

Ki sa lah nang leit kumno?


Ka ba kum kane ka sentens ka long ha ka rukom jingkylli halor ka jingong **lah nang leit** khamtam lei lei lada ha ka jingmut u nongong ia katei, ka don ka jingbyinsngew lah ngeit ba kita ki briew ki lah nang leit. Lada ka **lah** ka bud ia ka **sa**, hynrei ym kum ha kane ka jingpyndonkam bad jingmut kata ka lah kam dei ka **progressive aspect marker** hynrei ka **modality marker** bad kumta ia ka yn mak **lah_m**. e.g.,

Ki sa **lah_m** pat ban iaaid biang nangta.

Kane ka sentens ha ka ba ka **sa lah_m** ki don lang ka kdew ba ka jinglah (ban iaaid nangta) ka long hadien katto katne ki jingia ia ki ba ym shym la kdew hangne.

Yn ym da donkam shuh ban kdew ia kiwei pat ki jingia khleh ki **aspect** bad **modality marker** namar ha ka ba kynthoh ia ka **lah** (**progressive**) la kynthoh ruh ia kiwei pat ki **aspect marker** bad **modality marker**.

KI KOT SHAPHANG KA KTIENT KHASI

- 
- 1 William Pryse,
AN INTRODUCTION TO THE KHASIA LANGUAGE
 - 2 H W Sten
KA GRAMMAR
 - 3 H W Sten
SHAPHANG KA KTIENT KHASI
 - 4 Iarington Kharkongor,
KA DIENSHONHI
 - 5 H Marwein
KI VERB KHASI
 - 6 H W Sten & A Kharmalki,
KA JINGHIKAI KHASI

KI AP IÄ PHI HA :



KHASI BOOK STALL

Room No 38
Synod Super Market
Mawkhair Main Road
Shillong - 793 002



NEW BOOK CENTRE

Police Beat House
Laitumkhrah
Shillong - 793 003

Rs. 2000